

# LE ALEGRE COMÀR DE RIULTÈLA

Commedia in 2 atti in dialetto bresciano  
di  
Velise Bonfante

Libero adattamento da  
**“Le allegre comari di Windsor”**  
di William Shakespeare

## PERSONAGGI

- |                         |   |
|-------------------------|---|
| 1. Franco Forte         | = FRANK FORD <i>cittadino di Windsor</i>                        |
| 2. Alice Forte          | = Madonna ALICE FORD  |
| 3. Tomaso Pagìna        | = GEORGE PAGE, <i>cittadino di Windsor</i>                      |
| 4. Margì Pagìna         | = Madonna MARGARET PAGE   |
| 5. Sig.na Anna Pagìna   | = ANNA PAGE <i>figlia di Page e madre Margaret Page</i>         |
| 6. Maltafina            | = FENTON <i>giovane nobiluomo</i>                               |
| 7. Don Ugo Pregadio     | = DON UGO EVANS <i>parroco gallese</i> (pronuncia: B = P G = C) |
| 8. Batista Penansima    | = BATISTA SHALLOW <i>giudice di campagna</i>                    |
| 9. Abramo Zìgol         | = ABRAHAM SLENDER <i>nipote del giudice Shallow</i>             |
| 10. Pierino il Semplice | = <i>valletto di Abraham Slender</i>                            |
| 11. Dott. Caius         | = DOTTOR CAIUS <i>medico francese</i>                           |
| 12. Giani Balù          | = JOHN RUGBY <i>famiglio del Dott. Caius</i>                    |
| 13. Picinèla            | = MONNA SPICCIA <i>fantesca del Dott. Caius</i>                 |
| 14. Gioà Strinaròss     | = SER JOHN FALSTAFF <i>cavaliere</i>                            |
| 15. Bertoldo            | = BARDOLPH <i>gente al soldo di Falstaff</i> (tirapièdi)        |
| 16. Pistola             | = PISTOL <i>da Hobgoblin, gente al soldo di Falstaff</i>        |
| 17. Robin               | = ROBIN <i>paggio di Falstaff</i>                               |
| 18. Tone                | = JOHN <i>domestico dei Forte</i>                               |
| 19. Batista             | = ROBERT <i>domestico dei Forte</i>                             |

### Personaggi eliminati

Guglielmo = *figlioletto di George e Margaret Page*

Tre o quattro ragazzini (*vestiti da fate nell'ultimo atto*)

L'oste della locanda della Giarrettiera

NYM al soldo di FALSTAFF – le battute di NYM (*Nemo*) sono state assegnate a Bertoldo

## ATTO I

### Scena I - la casa di Pagìna

(Entrano il giudice Penansima, Zìgol e don Ugo Pregadio.)

Penansima) Vardì don Ugo che me cambie mia idea. Farò en burdèl der chèi gròs. Gròs a tal punto che i me sentirà enfinamai a Brèsa e fin sö a la Madalena. Gna se ghe en fós vint (20) de Gioàn Strinaròs mès ensèma garés pora. Nüsü pöl permitìs de tö ‘n gìr (de ciapà per el cùl) el giudice di pace Batista Penansima.

Zìgol) Me zio l’è en giudice di pace de chèi toghi, oltre che a Brèsa l’è cunusìt a Mantua, Bèrghem, Vicensa, Venesia e Milà.

Penansima) Se pöl dì che g’ho giràt töcc i tribünai de l’alta Italia.

Zìgol) Sorbole e ratolorum! Vardì don Ugo che me zio l’è apò mès nobile.

Penansima) Maché mès! Nobile entréch e da pö de trezènt agn!

Zìgol) Eh sé! Nobile e co’ le stèma. En sima gh’è: “dùdes aole bianche” j-è mia tancc chèi che pöl pirmitìs dùdes aole bianche sö le stèma.

Penansima) Le aole j-è pès de lach, el pès de lach l’è mia salàt compagn del bacalà che me parì gó.

Don Ugo) Dùdes pölès pianch (bianch) i va pé (bé) sö de ne stema vècc. I che sta pé ensima. I pölèss j-è de casa sö l’òm. I viv ensema a l’òm, e i significa “te vòl pé” i vòl di “amur”.

Zìgol) El siv zio, che me pazarés zontaga en bris de nobiltà apò al me de stemma.

Penansima) Nüsü te la ‘mpedìs, però prim g’ho idea che te gàbet de spuzàt.

Don Ugo) Me dize che a spuzàs el quarto di nopiltà se pöl ciapàl come pirdìl.

Penansima) Sti mia a dì stüpidade.

Don Ugo) Ma sé, lasóm perder che ch’è ròpe pö importanti. Se el cavalier Cioàn Strinaròss el v’ha ufindit, caro el me ciudice Penansima, mé, me mète de mès e sircaró de fav fa pace.

Penansima) Farò ricùrs en apèl e pó en casasiù. En tribünal el garà bé de decider.

Don Ugo) Sti atento, sèrte ròpe j-è delicate de tratà. Ciapì pé le vòse misüre,

Penansima) Ah, se ghes en qualche an de men ve farés veder mé come che sistemerés la questiù.

Don Ugo) No, le maniere forti le va mia pé, sarés mei che j-amici i se metés de mès per rià a mitica na preda süra. Però m’è vignit en ment n’altra ròpa. Ve ricurdìv la madamina Anna Pacìna, chèl pèl pucunsi, la fiöla de maestro Tomaso Pacìna?

Zìgol) Chi, madamina Annetta? Chèla muritina che parla isé: cicì, cicì, come che fa le comàr?

Don Ugo) Ah sé, ah sé, "cicì, cicì"! L’è pròpe lé, e con de en möcc de palanche, e de or e de arzènt e alter reciuchi de valur, che sò nóno el c’ha lasàt en eredità. Lasóm en panda le stüpidade e parlóm de ròpe serie. Compinóm en pèl matrimone fra el nòs Zìcol e madamina Annetta.

Zigol) Sorbole e ratolorum! Debù sò nono el g'ha lasàt en dòta en möcc de palanche?

Don Ugo) Certo, e sò pàder el che zónta en **panda** amó vercót de mancia.

Penansima) Apó mé la conòse, l'è na signorina bé empiantàda.

Don Ugo) En möcc de palanche con zontàt en **panda** amó vercót! L'è de pö che **pé** empiantàda.

Penansima) Sö, nom a troà chel galantòm de Pagìna. Magari ghe catóm là apó el cavalier Strinaròss.

Don Ugo) Da la me **póca** ve föra apena la verità. Sé, el cavalier Cioàn Strinaròss l'è pròpe lé. Però vó **chì** de scultàm, **chi** de scultàm perché me ve vöi **pé**. Adès ciòche a l'ös de Messer Pacina (*Bussa.*) Uhù, **ch'è** nüsü? El Signur el penedise la vòsa casa.

Tomaso) (*Di dentro*) Chi è? (*Entra Pagìna.*)

Don Ugo) L'è la **penedisiù** del Signur, só ché mé, el **ciudice** Penansima e chèsto **pèl zuinòt** de mastro **Zicol** che, se vó **chi** òja de sintil el **carés** de div dò paruline.

Tomaso) Só contènt de véder che stiv töcc bé. E ve ringrasie giudice Penansima per chèl sistèl de fazà e durcc (tordì) che mi mandàt.

Penansima) Maestro Pagìna, so contènt fis de vidiv. De bù v'è piazit i me fazà? L'è stada na giornada scarsa, g'ho mia ciapat de mei.

Tomaso) Vó siv trop bu compar, gracie, gracie.

Zigol) Che vo ghe cridighe o nò, ve ringrasie apó me.

Tomaso) Oh, caro messer Zigol, só prope content de vidiv.

Penansima) Gh'è ché el cavalier Strinaròss da vò?

Tomaso) Se, l'è ché. E me, se ghes de pudì, sares el prim a mitim en mes per fav fa pace.

Don Ugo) Chèsto ché l'è prope en parlà de calantòm.

Penansima) El cavalier el m'ha fat en tòrt gròs, maestro Pagìna.

Tomaso) Sé, apó a lü el se n'è rindit cönt.

Penansima) El fato de rindisèn de cönt völ mia di che el tòrt el se scancèle. El mia vera maestro Pagìna? Fam tòrt a me, en giudice, el l'ha fada pròpe grossa.

Tomaso) Ècol che ria el cavalier Strinaròss.

(*Entrano ser Gioàn Strinaròss, (Nemo) Bertoldo e Pistola*)

Strinaròss) Alura, giudice Penansima, ghiv prope decidit de denunciàm?

Penansima) Cavalier, vó ghiv ciapàt a bastunàde i me malghés e per fala pö bèla siv nàt en del me ròcol sensa domandam el permès.

Strinaròss) Sé, per daga en bazì a la fiöla del guardiacacia.

Penansima) Uh che spirit di patata! Chèsto sarés el mén. L'è del rèst che ghiv de rispónder.

Strinaròss) Ve risponde sübit. Sé, l'è vera. Siv contènt. Èco, za rispondìt.

Penansima) Vedari! Vedari vó quan che le uss le riará al tribünal.

Don Ugo) *Pauca verba*; ser Cioàn, poche parole ma **pune** (buone).

Strinaròss) Poche parole el bel nient. Che ve bala en de la söca, Zìgol? Cosa ghiv contra de me.

Zìgol) Sorbole ratolorum! La me söca l'è piena de ròbe contra vó e contra i vòs tirapè Bertoldo, Nemo e Pistola che prim i m'ha portàt en de n'osteria, pò i m'ha fat embriagà e vödat le scarsèle.

Bertoldo) Oibò, testa de strüdel, siv stat vó a vignign a dré.

Zìgol) Che sif dré a dì, me ghe c'entre mia...

Pistola) Möer sö en can-can compàgn per nient

Zìgol) Me ghe c'entre mia...

Bertoldo) (Nemo) Testa de strüdel! Vardì che nóter sóm bù de fav sö a fitine se la gne gira.

Zìgol) Zio, el siv endó gh'è nat Pierino, el me servidùr?

Don Ugo) Calmiv e sercóm de sistemà le ròpe. Som en du a fa de arprito. Fidelicet me medesmo, e fidelicet maestro Pacìna. Decidaróm nóter du sö töta la questiù.

Tomaso) El g'ha dit bé don Ugo. E sistemaróm le ròbe sensa na a fa pajasàde en piasa.

Don Ugo) **Pene, pene, pene.** Scrie söl me taquì come che sta le ròpe e pó decidarom.

Strinaròss) Ehi, Pistola!

Pistola) So ché siòr padrù.

Strinaròss) Ehi Pistola, dim la verità: ghet vödat le scarsèle a mastro Zìgol?

Zìgol) Sicür come la mort, che el me j-a vödade. E ghe j-ere bèle sgiónde.

Strinaròss) Alura Pistola, el vera?

Don Ugo) No, sarà fals come Ciuda, visto che l'è en mès delinquent.

Pistola) Ehi siòr, come se permètel de di isé. Ser Gioàn el ghe faghe rimangià chèl che 'l g'ha dit!

Zìgol) Sorbole e (*Indica Bertoldo*) ratolorum! Só pó che sicür che l'è stat lü.

Bertoldo) (Nemo) Messer, òcio a chèl che dizì, perché se me salta el frinco só bèla bù de fa nà le mà, le me fa za spür. Se pöl mia sèmper ófender la zènt endàren.

Zìgol) Se l'è mia stat lü l'è stat l'alter, chèl có la facia de embriagù. Apò se me ricorde mia tant bé, perché i m'ha fat bèer, só mia en sumèl, só mia stüpít del töt.

Strinaròss) Cosa ghe rispóndet Bertoldo dele sguanze róse?

Bertoldo) Siòr padrù, lüche bev e ribev el g'ha pàrs el servèl dré a le scale. Bev e ribev el g'ha pàrs töte e sich le sentense.

Don Ugo) I cinque sensi, se dis! Mia le cinque sentense. Ignorànt de ‘n sumèl.

Bertoldo) Lü l'era embriach mars, quan che l'è stat el momènt de pagà, el g'ha dàt töcc i só sólcc.

Zìgol) Se mai me vegnarà set amó, endarò a béer con dele persune oneste, civili, pie, timorade de Dio. Bearó pò ensema a giargianéss compagn.

Don Ugo) **Prao** mastro Zìcol. Isè se fa. E i **pu** propositi i va mantignicc.

Strinaròss) Siori: che finis la storia. Ghiv sintit töcc che a la fi de la sunada nó gh'è sücès nient.

(*Entrano Anna Pagìna [che porta del vino; e poi] Alice Forte e Margì Pagìna.*)

Tomaso) No, cara la me tuza, il vi ripòrtel en casa; el bearóm de dénter. (*Esce Anna Pagìna.*)

Zìgol) O Cielo! Chèla l'è la madamina Annetta!

Tomaso) Oh, siura Alice Forte, che me diziv de bèl?

Strinaròss) Cara la me comar Forte, come só contènt de vidiv. Pòde cara la me siura? Me dala el permès? (*La bacia.*)

Tomaso) Fómna, figa bèla cera a chèsti siòri. Nom che gh'è za la taola pariciàda; dènter, dènter, cumudìv, deanti a en bel piat de pastasöta e a un bu bicér de vi, pasa töte le biligornie.

(*Escono tutti tranne Zìgol, Penansima e don Ugo.*)

Penansima) Dessèdet Zìgol! Dessèdet! Nom che j-è dré a spetà apena te. G'óm de parlà. Somèa che ghe sape sentùr de na proposta, ciapada en pó a le larghe e bötada en pó là isé dal nòs don Ugo. Me scultèt chèl che dize?

Zìgol) Sorbole, se le ròbe le sta isé faró chèl che pòde.

Penansima) Abelàse, ma sérca de capìm.

Zìgol) Zio, vardi che l'è chèl che só dre a fa.

Don Ugo) Dirvì **pé** le rìce mastro Zìcol e sti atento e sculta **pé**.

Zìgol) Faro töt chel che me zio, el giudice Penansima el me dizarà de fa. Scuzìm se ‘l dize, ma lü l'è giudice e me vale gnent.

Don Ugo) L'è mia chèsta la questiù, la questiù la sta töta en del “maridàs”.

Penansima) Giösta, la questiù l'è pròpe chèsta.

Don Ugo) Ater fat che chèsta. L'è apena chèsta... e co' la madamina Anna Pacìna.

Zigol) Sorbole! Se la questiù l'è apena chèsta la spùze apò sübit, a cundisiù, s'entèndi, che la gabe na buna dòta.

Don Ugo) Ma dopo chi de fav vulì **pé** da la tuza. Chiv capit? E chiv de dimèl có la vòsa poca, ciar, cridìv de rià a fachela a vulica **pé** a la tuza?

Penansima) Zigol, Zigol mio, te la sèntet, dopo, de vuliga bé?

Zigol) Crède de sé, ghe la metaró töta, faró chèl che pòde.

Don Ugo) E no, l'è mia asè. Chi de dim, ciar e tond, se l'è en mester che se pöl fa.

Penansima) Nòter volom sai se con de na buna dòta te set disposto a spuzala.

Zigol) Per na buna dòta pòde fa töt.

Penansima) No, te ghe mia capit chel che som dré a fa. Alura, ghe volarét bé a sta tuza sé o no?

Zigol) Na vòsa parola e me la spuze. Se en prinsépe el ghe sarà mia, l'amur el vegnarà dopo. Dopo maridacc gh'è töt el temp per cunusis, l'è na bèla tuza, de sicùr la me farà mia scarèsa. Se vizio me dizi de spuzala, me la spuze sübit... “dissolutamente”.

Don Ugo) Praelo, però endò casca l'àzen l'è chèl “dissolutamente”. Forse vulièv dì risolutamente?  
Ma l'intensiù l'è puna.

Penansima) Ma certo che el vulià dì risolutamente. El mia vera Zigol?

Zigol) Certo zio.

(Rientra Anna Pagìna.)

Penansima) Èco, èco che ria la nòsa bèla madamina Annetta. Pecàt che só vècc, cara madamina.

Anna) El disnà l'è en taola. Mè pàder el ve spèta.

Penansima) Ai ordini cara madamina. Sala che lé l'è pròpe en gran bèla?!

Don Ugo) Vègne, vègne a mé, pòde mia manca quan che i me envida, sares maleducasiù. Mancià e cratà l'è asé ampià (mangiare e grattare basta cominciare).

(Escono Penansima e don Ugo.)

Anna) E vo, vigniv mia dènter?

Zigol) No, grasié, sto bé isé.

Anna) Sensa mangià?

Zigol) G'ho mia fam, grasié lo stes. De bù, g'ho mia fam.

Anna) I volarà mia sintas zó a taola se vó vignì mia.

Zigol) Se g'ho mia fam, g'ho mia fam.

Anna) Sö de brao, el vègne.

Zigol) No, grasia, preferese fa du pass che de föra, da quan che só cascat de caal l'udur de la càren el me fa vègner engosa. Ma gh'è en giro en qualch sénghen co n'orso?

Anna) Sé, l'ho sintìt a dì ger matina en piasa.

Zigol) Ve fal pora l'orso?

Anna) Ostis se 'l me fa pora!

Zigol) A me nò, a olte me vegnares òja enfin de nà a sinsigal, tiaraga la cua. Me g'ho mia pora dej orsi. Gna 'n pó.

Tomaso) (*Entrando*) Alura vignìv o vigniev, söm dré töcc a spetàv.

Zigol) Ve ringrasie compar, ma g'ho mia fam.

Tomaso) (*Sbrigativo*) Fam o mia fam: dènter e se 'n parle pö.

Zigol) (*Gli cede il passo*) Prima vó.

Tomaso) No, no, prima vo.

Zigol) Madamina Annetta, pasì vó alura per prima.

Anna) Oh nò, me nò, me permetarès mai.

Zigol) Sorbole. Mé pase mia per prim, voi mia faga de tòrt. Pasà völ dì èser vilan e maledücat

Anna) Per piazér, pasì e mocomela lé.

## Scena II - la stessa (casa di Pagìna)

(*Escono. Entrano don Ugo e Pierino.*)

Don Ugo) Dessèdet, **campe** en spala e va a sercà la casa del dutur Caius endó che sta Picinèla che la che fa de maséra.

Pierino) Sübit, nò che brüze (*fa per uscire*).

Don Ugo) (*Lo ferma*) En momènt, daca chèsta lètera. L'è per perorà la causa del tò padrù, mastro Zicol. Picinèla l'è stada la **chidasa** de madamina Annetta e se la völ la pól mitica do pune parole. Va, che me naró a finiser de disnà. Manca amó formai e fröta. (*Pierino esce.*)

## Scena III - la locanda della Giarrettiera

(*Strinaròss, Pistola (Nemo) e Bertoldo.*)

Strinaròss) No, con chesti ciar de lüna gh'è mia tant de sgalezàla.

Pistola) Sarés mei sircà de fa vègner el sul.

Strinaròss) Se pól mia nà avanti isé. G'ho de stüdià en vergót per caàm da le pètole.

Pistola) Se garà bé de mangià töcc i dé.

Strinaròss) Conusiv en tal de Riultela che el se ciama Franco Forte?

Bertoldo) Oibò, i la conòs töcc, apó mé, l'è giü che g'ha mia frèt ai pé, l'è giü pié de palanche.

Strinaròss) L'è en pó che stròleghe. G'ho en certo bisighulì che me röma endinamai en pansa. G'ho de ciapà de le misüre...

Pistola) Misüre, fi sensa mizürala, la sarà du mèter e mès chèla pansa lé.

Strinaròss) Móchela de schersà Pistola! Sarà apò du mèter e mès de pansa, ma vergòt se g'ha de mitiga dènter. Chèsto l'è mia el momènt de dimagri, per rinforsà le finanse g'ho decidit de faga la corte a la moer del siòr Franco Forte. G'ho na mèza idea de piaziga, de èser el sò tipo. Quan che la me arda con chèi so du bëi öocc, somèa che la me dize "Só vòsa cavalier Strinaròss, vignì a töm!" Mia per dì, ma mé so amó en gran bël òm, de chèi tóghi, piaciùs.

Pistola) L'arés mai dit de chèla siura lé.

Strinaròss) La zènt la dis che l'è le a tègner i curdù de la bursa.

Bertoldo) (Nemo) Alura s'è zabela töt risolto.

Strinaròss) G'ho scrit na lètera per lé e giöna per la moér del maestro Pagìna. Apò a lé la me varda sèmpre con du öcc. La me squadra dal có ai pè, aanti e endré. Però capise mia perché i sò du öcc de sul i se ferma sèmpre sö la me la pansa.

Pistola) Se vèt che stralüs el sul söl ledàm.

Bertoldo) (Nemo) Oibò, chèsta l'è pròpe bèla.

Strinaròss) Ve dize che ghe piaze. Vidiv mia come che só bël! L'è per chèl che la me endora coi so öcc. E che öciade malandrine. E apò lé la tè i cudrù de la bursa en casa sua. E me ghe farò de banca a töte dò. Gne spèta sölcc a birulù. Va e portega sta lètera a la comar Pagìna e tè, porta chest'altra a la comar Forte. Faróm furtüna. La fürtüna la m'ha za bazat la front.

Pistola) Un òm de unur compagn de mè! Fa 'l galùpi! Fa 'l sensàl! Fa 'l röfià!

Bertoldo) (Nemo) No. Gna mé serte ròbe le fo mia. Tigniv la vòsa lètera spurchignuna. Mé, só tròp galantòm per fa sèrte ròbe.

Strinaròss) [A Robin] Ehi te Robin, ciapa chèste dò lètere e va a consegnale. Sübit, de cursa. L'indiris el gh'è scrit ensima. E voalter du: fóra dai pé, becamórcc screansàcc. Via, vöi pö vidiv: sif töcc du licensiàcc.

(Escono Strinaròss e Robin.)

Pistola) Che i pisù i te magne töte le bödèle! Låsel pèrder, nóter farom fürtüna en de le osterie coi nòs dadi trùcàcc. Gh'è ne en bordèl de polastrei en gir de spenà.

Bertoldo) (Nemo) Nòm a spenà i polastrei ma nòm apò a vendicàs de chèl slambròt.

Pistola) Vöt vendicàt?

Bertoldo) (Nemo) Oibò! Alter fat che vendicàm.

Pistola) Pènset de bù de rià a faghela pagà cara?

Bertoldo) (Nemo) Àter fat che cara, cara e salada. Te vedarè! Entant ambie col nà dal maestro Pagìna e ghe cönte chèl che l'è dré a machinà el nós pirlòt.

Pistola) Te, te vèt dal maestro Pagìna e me naró dal siòr Franco Forte. E ghe dize che ràssa d'empustur che l'è el nos Strinaròss. Ghe dize che 'l völ nà a spipiolàs en del sò lèt sto spurchignù. Sinsigà isé la poera siura Forte.

Bertoldo) (Nemo) Nom entant che el mester l'è bel cald. E ghe sofiaró en de le rice al maestro Pagìna de doprà el veleno, o en varegòt che el la faghe deentà zald, per fal s-ciopà de iterisia. Se a me me salta el frinco so bu de èser periculùs.

Pistola) Bertoldo, te set pròpe en drago! Te en drago e me en toro: sö, a la carica... (*Escono.*)

#### Scena IV - la casa del dottor Caius

(*Entrano Picinèla Balù e Pierino.*)

Picinèla) Eh, Balù! (*Entra Balù.*) Fim en piazer, nì a la finestra e vardì che no vègne en sa el nòs padrù, el dutur Caius. Se 'l cata vergü en casa, el se encàsa compagn de na bèstia e l'ambia dì serte litanie de fa deentà ros en peerù.

Balù) Ghe pènse mè. Sti mia a preocupav, fó me la guardia.

Picinèla) Va, che stasera dop sena bearóm ensèma el vi brulè deanti al camì (*Esce Balù.*) L'è pròpe en brao tus (*A Pierino*) Alura, vó sì Pierino il semplice e 'l vòs padrù l'è mastro Zìgol?

Pierino) Sé siora.

Picinèla) E il vos padrù el sares mastro Zìgol?

Pierino) Se siòra, l'è pròpe lü.

Picinèla) Com'èl come padrù? En rompibale o el fat de pastafrola?

Pierino) Gne giü gnè l'alter. L'è svelt de servèl e svelt de mà.

Picinèla) El sarà mia chèl che camina col nas per aria e par che el gabe en pal enfilsat en chèl post?

Pierino) L'è pròpe lü siura Picinèla.

Picinèla) Che el ciél no 'l ghe mande gnènt de pès. Diziga a don Ugo Pregadio che farò töt el posibil per el vòs padrù. L'Annetta l'è na braa tuza, e per le me volarés...

Balù) (*Entrando.*) Förà, föra per carità, ria 'l principàl.

Picinèla) Se 'l ve cata el gne spèla viv. Zuinòt scapì, no mèi amò scondiv el del vestare, el narà via sübit, de sicür el se ferma mia. (*Pierino si caccia nell'armadio.*) E te Balù vaga encontra. (*Canticchia.*) E sö e zó e per la Valcamonica, la si sente, la si sente...

Caius) (*Entrando.*) *Parbleu*, cosa ghìv de sighthà a cantà. El siv che me dà fastide. Ni per piazér a töm el del me vestare *une boitine verte* na scatulina verda. Ghiv capit quala scatulian verda?

Picinèla) Sicür che g'ho capit quala che l'è. Vo a tövela sübit. (*A parte.*) Per fürtuna el m'ha mandat me e l'è mia nat lü. Se el ghe cata denter el garzù el sarés montàt en bestia (*esce*).

Caius) *Fe, fe, fe, fe, ma foi, il fait fort chaud Je m'en vais voir à la court la grande affaire*

Picinèla) Èla chèsta siòr padrù?

Caius) *Oui, mette-le* ne la me scarsèla, *dépêche*, peséghet. Endó el chèl mangia pà a tradimènt de Balù?

Picinèla) Chi? Ehi, Balù, Giani Balù.

Balù) Só ché, padrù!

Caius) Balù vègnem dré, tö sö la me bursa e non de onda en ospedal.

Balù) La bursa sior dutur l'è za ché pronta, sota el pórtech. Gh'è za töt pronto.

Caius) *Parbleu*, me par de desmentegam vergót, *que ai je oublié?* *Parbleu*, le siringhe che gh'è en del me vestare, pòde mia lasale a casa, e se dopo le me vocór?

Picinèla) Ah misericordia, adès el ghe cata el garzù de mastro Zigol e 'l dà föra de mat.

Caius) *O diable, diable!* Chi gh'è en del me vestare? canaja *larron!* (*Tira fuori Pierino.*) Balù, el me bastù, sübit.

Picinèla) Padrù calmiv, sti chiét, sti mia agitav.

Caius) *Diable*, gares de mia agitam? De calmam? E perché mai?

Picinèla) Lü l'è mia en làder, l'è en poer garzù, ma onèst-onestènt.

Caius) *Parbleu*, cosa ghe fal en zuinòt onèst-onestet en de el me vestare? Spètel el treno? Nüsü òm onèst-onestènt el se sares mai permès de scundis en del me vestare.

Picinèla) Sti calmo per piazér. Adès ve cönte töt. Lü l'è stat mandàt ché da don Ugo Pregadio, el farmacista.

Caius) Bien? E alura?

Pierino) Messersì l'è la verità: sie vignìt per domandaga...

Picinèla) Stt, stt, per carità!

Caius) Sito en corno, fi sito vò per piazér (*a Pierino*) alura? Föra töta la storia.

Pierino) Mandàt da don Ugo Pregadio, só vignìt a domandà a la siura Picinèla se la pöl mèter dò bune parole có la madamina Anetta Pagìna, per el me padrù, mastro Zigol che 'l g'ha mès ensima j-öcc, e par che el gabe apò de le intensiù serie.

Picinèla) Però mé vöi mia c'entraga, vöi staghen en föra, j-è afari che m'enterèsa mia.

Caius) *Diable*, don Ugo el ve manda? Balù, *baillezz.moi*, pàsem en tòch de carta (*scrive*).

Picinèla) (*A parte al Pierino*) Menomàl che ‘l s’è mia ‘ncasàt, sedenò sintièv che uzade! Restom entés che me faró per el vòs padrù töt chèl che pòde e apò chèl che no pòde... el dutur Caius, l’è ‘l me padrù. E me pòde ciamal padrù perché ghe tègne la casa, ghe lae, stire, ghe dó de mangià e de beèr, ghe rifò so el lèt e töt de per me cönt e...

Pierino) (*A parte a Picinèla*) Càspita, e fiv töt de sula töte chèle ròbe lé?

Picinèla) (*A parte al Pierino*) Sula-sulenta, fó töt mé en chèsta casa, e per fa töt lie só bunura e vó a lèt tarde. Lasóm sta. Scultim chèl che ve dize en de na ricia: el me padrù le enamurat còt de la madamina Annetta. Però, apena mè só cosa ghe pasa per el có a la nòsa bèla madamina. E lé nó la pensa gna a giü e gna a l’alter.

Caius) Te, sömiòt, portega chèsta letera a don Ugo. *Parbleu*, l’è na disfida. Vöi ensegnaga a chèl rugnus de ‘n farmacista le bune maniere. El g’ha de emparà de pensà ai afari sò e mia mitiga el bèch en chèi de j-alter. Va, va...set che amò?

(*Pierino esce.*)

Picinèla) Poarèt, no ‘l g’ha né culpa né pecà, el s’è entromès apena per faga en piazer a ‘n amico.

Caius) Me n’emporta gnènt, vó Picinèla mi dit che la madamina Annetta la straèt per mè! Ghe daró na lesiù de chèle giöste a chèl sömiot de en farmacista che el se la ricorderà per en pès. La madamina Annetta la garà de èser mia, apena mia e de nüsù alter.

Picinèla) Siòr padrù la tuza la ve völ bé e se sistemerà töt. Lasóm ciciarà la zent, la zent l’è fada apostà per ciciarà endaren. E che cavolo!

Caius) (*A Balù*) Coso, nóm nóm en ospedal. (*A Picinèla*) *Parbleu*, madamina Annetta la vöi per me, töta per me ghiv capìt? Sedenò en quater e quatròt ve càse föra de casa mia. Me söi spiegàt! (*A Balù*) Nóm, peseghet che góim za pèrs en möcc de tèmp.

(*Escono Caius e Balù.*)

Picinèla) La sarà vòsa, la sarà vòsa... e ve starà bé se dopo la ve farà deentà mat. Mé el só cosa ghe pasa per el bel sirvili de la tuza. E menomal che quan parle la me sculta.

Maltafina) (*Di dentro*) Ehilà! Gh’è vergü en casa?

Picinèla) Vó chi siv? Vignì en sa per piazér. Che sirchiv ?

Maltafina) (*Entrando*) Buondì comar, come nòmi?

Picinèla) Nom mia mal, però la podarés nà mèi.

Maltafina) Novità? Come stala la nòsa bèla madamina Annetta?

Picinèla) Eh, l’è pròpe bèla, onesta e buna. E ringrasióm el ciel che la ve völ bé.

Maltafina) Secondo vó, alura, ghe l’ho na qualche speransa.

Picinèla) Gh’è töt en de le ma del Signur. Però mé, compar Maltafina, sarés pronta a züra che apò lé la ve völ bé. Vossignoria ghif mia en pòr prope ché sö l’öcc?

Maltafina) Sé, porca galina, ghe l'ho, e alura?

Picinèla) Nüsü alter me farà mai rìder compagn de lé. L'è na tuza alegra e piena de sghèo. Pòde mia div töta la storia adès perché l'è longa, ve dize apena che la g'ha sighità per de pò de n'ura a parlà del vòs pòr.

Maltafina) De bu?! Speróm de vidila prim de sera. Toh, ciapa, cheste palanche j-è per vó Picinèla. Se la vidiv prim de me, saludimela e, me racomande, metìga na buna parola.

Picinèla) Sicür, sicür. E la prosima ólta vé cöntarò chèl che la dis del pòr e de altre ròbe. E ve dizaró apò dei moscardì che ghe rirula entùren.

Maltafina) Prosima ólta, adès g'ho mia tèmp de pèrder.

Picinèla) Ve salüde ecelenza! (*Esce Maltafina.*) Töt somato l'è en brao òm, però la me Anneta l'è mia ennamurada de lü, me el só chel che ghe pasa per chel sò bél sirvilì (*esce.*)

## ATTO II

### Scena I - la casa di Pagìna

Margì) (*Entra con una lettera.*) Beato cielo! G'ho mai ciapat de le letere d'amur quan che ghié vint agn, tömot che i me scriv adès. Vedom: (*Legge.*)

"Non ditemi ch'io vi spieghi perché v'amo, dacché pur se l'Amore chiede a Ragione avviso, non l'accetta però per consigliere. Voi giovine non siete, ed io non più; e questa è affinità. Voi siete giuliva, ed io lo sono pure e questo ci fa più affini ancora. Vi piace il vino santo, e pure a me. Vorreste forse affinità più affine? Se vi basta l'amore d'un soldato - io vi amo. Ed io non vi dirò, pietade abbiate di me, ché tal non è parlare da soldato. Io vi dico, amatemi. E firmo, - Il vostro fido scudiere, - di giorno o di sera, - per ogni lumiera, - pronto per voi a pugnar – sono in vostro potere, Giovanni Strinaròss."

Che müs de tàper! Cosa me tóca de lèzer! En che mond vivóm al dè de 'ncö! El fa finamai scarësa dal tant che l'è gras. L'è quasi gna bu de sta en pè, l'è dré a burlà en tèra a tòch e 'l vé che a fam le proposte compagn de 'n moscardì. Bisògn che ghe faghe sbasà la cresta a sto galèt. El g'ha pasat el sègn. G'ho de faghela pagà.

Alice) (*Entrando.*) Comar Margì, pinsì che sie pròpe dré a vègner de vó.

Margì) Che coincidensa! Pròpe adès, apò me sie dré a vègner a sircàv.

Alice) Vègner a sercam me? Ghe crède gna se 'l fós vera.

Margì) Se v'èl díze, völ dì che l'è vera.

Alice) E me, envece, podarés fav véder en vergòt che pröa el contrare. Lasóm sta. Comar Margì, só vignida per domandàv en consiglio.

Margì) En consiglio? A me?

Alice) Sé, a vó. El siv, cara Margì, fos mia perché só na fómna onesta, podarés deentà nobile.

Margì) Freghiven de töt e de töcc, caìv la òja: deentì nobile. Cöntim, sö, cöntim, com'èla la storia?

Alice) Per deentà nobile garés de acetà, per en minüt sensa fi, de spärter l'inferno con dei diàoi.

Margi) Lasì pèrder alura. Al de de 'ncö i nobili i val pö gna na cica de tabach. Per me, ve convié resta chèla che siv.

Alice) Me cridiv mia? Alura lizì ché, vardì se podarès o nò deentà nobile. E cavalieressa! Quala tempesta garàla fat rià fin sö le coste de Rioltèla chèsta balena co la pansa piena de ójo? Per chi m'hal ciapat! Cosa crèdel? D'istinto me ve de vendicam. Me vegnarés òja de daga corda, daghen tanta fin a fal empicà. Fin a quant no el se crèderà de tocà el ciel con de en dit; e pó daga en tirù de chèi giös-cc e patascianfete en tèra. E lasal lé a tòch, a desfàs en del sò gras.

Margi) Lètera per lètera comar Alice, vardì chèla che g'ho ciapàt me. (*Confrontando la sua con la lettera di Alice*) Che sfasàt! Apena i nòm Pagìna e Forte j-è mia i stès, sedenò l'è precisa en tot. El siv che 'l fa lüche? El j-a fa stampà e 'l ghe lasa apena el nom en bianch.

Alice) Stèsa carte, stèse parole, de sicür stèsa mà e stèsa firma. Cosa pènsel che sóme noaltre dò? Per chi gnal scambiàt?

Margi) Se ghes ciapàt dò s-ciafe non ghe sarés restada isé mal. E sé che crède de viga mai dàt nüsü pretesto per 'na lètera compàgn.

Alice) Apó me me sènte ofesa. Som fómne onèste noaltre dò.

Margi) E alura vendicómes. (*Idea*) Ghe dóm 'nappuntament e fom finta de staga, fom finta de viga göst che 'l gné faghe la corte, gnigni gnignò e pó el tiróm en del tranel.

Alice) Me ve tègne bòta. El faróm deentà mat. L'è asé che el me òm el vègne mia a sail, l'è isè gelus! Guai se 'l ghes de véder chèsta lètera.

Margi) Vardì, l'è pròpe dré a rià, e gh'è apó el me òm. Lü l'è mia gelùs, me ghe nó mai dat motivo.

Alice) Se ghésev de sai che fürtünada che siv!

Margi) Lásomei vègner en sa e noaltre nom a stüdià el modo de fa en bèl schèrs al nòs spasimante. Vedari che a l'ozèl engurd, ghe faróm crepà el gös. Nom.

(*Vanno sul retroscena. Entrano Franco Forte [con] Pistola e Bertoldo (Nemo) maestro Pagìna.*)

Franco) Spere pròpe che la sape mia isé.

Pistola) La speranza, a olte, l'è compagn de en ca sensa cua. Ve dize che 'l cavalier Gioàn Strinaròs l'è dré a fa la corte a la vòsa fómna.

Franco) Me fómna l'è mia pö na tuzèta, la g'ha la sò bèla età.

Pistola) E alura? A lü: ghen fréga gnènt. A lü: le ghe piàs töte: bèle e bröte. Caro compar, siv avisàt.

Franco) De bù l'è dré a fa la corte a me fómna?

Pistola) Súcür. Se v'el dize. E chèla lé, l'è na parola pròpe bröta.

Franco) Quala parola?

Pistola) I córegn caro el me siòr. Stì atento, tignì j-öcc dervèrcc. Òm avizàt, mès salvat (*esce*).

Franco) (*A parte*) Vöi vidiga ciàr en de chèl pastis ché.

Bertoldo) (Nemo) (*A Pagìna*) Chèl che dize l'è vera. Gioàn Strinaròss l'è dré a faga la corte a vòsa fómna e chèsto l'è parlà ciar. V'el züre. Che rèste ché fulminat se l'è mia vera. Chèl che gh'ere de div l'ho dit e adès vó, ve salüde maestro Pagìna (*esce*).

Tomaso) Per me lüle el sa gna chel che 'l se dis. El me par en slambròt dei prim.

Franco) Bisogna che 'l tègne döcc chèl Strinaròss de l'ostrega.

Tomaso) G'ho mai sintit nüsü isé arogante e pretensiùs compagn de chèsto embruiù.

Franco) E magari l'è bèle bù de fal saltà föra en qualche altari.

Tomaso) Ghe crède mia a chèl che 'm m'ha dit. Gna na parola crède. El m'ha fat na bröta empresiù.

Franco) El m'ha fat na bela empresiù.

Tomaso) Buondì Margì, che siv dré a fa de bel?

(*Margì Pagìna e Alice Forte si fanno avanti.*)

Margì) E vó endó siv dré a nà Tomaso? Spiti en momènt che g'ho de cöntav na ròba!

Alice) Cosa gh'iv Franco che me pariv isé zó de corda?

Franco) Zo de corda, gna en pó, vó pötost el mia mei che turnìv a casa vòsa?

Alice) Ah, chisà cosa ghe pasa per la mènt al me òm. Nóm noaltre dò comar Margi?

Margì) Sé, vègne comar Alice. E vó, vignìv a disnà, Tomaso? (*A parte a Alice Forte.*) Varda chi ria, ghe faróm fa de pustina al nos cavalier.

Alice Forte) (*A parte a Margì Pagìna*) Ghie pensat apó me a léle, l'è pròpe chèl che gne ocór.

(*Entra Picinèla.*)

Margì) Siv vignida a troà mé fiöla Anna comar Picinèla?

Picinèla) Pròpe cara la me comar, e dizim per piàzer, come stala la me Annetta?

Margì) Vignì en casa che fóm dò ciacole.

(*Escono Margì Pagìna, Alice Forte e Picinèla.*)

Tomaso) Alura compar?

Franco) Ghiv sintìt apó vó chèl che 'l m'ha dit chèl stüpidòt.

Tomaso) Certo, e vó garì sintìt chèl che m'ha dit a mé l'alter giargianés.

Franco) Garai dit na bòzia o garai dit la verita?

Tomaso) Per me Giòan Strinaròss l'è mia bu de fa na roba compagn. Chei du l'e j-è apena du servidur che gh'è stat licensiat e che völ vendicàs.

Franco) Laurai per lüle, chei du lé?

Tomaso) E certo, j-era pròpe i sò tirapè.

Franco) Ma lü stal mia a la “Locanda de la giarrettiera”?

Tomaso) Sé, el sta lé. E siv che vé dize caro el me siòr Franco Forte, che me ‘l lase fa. Völel me móer? Se lé la ghe sta el se la ciàpe, portaró le conseguense.

(Entra Pensnasima, giudice di campagna)

Franco) Mé, me fide mia tat de mé fómna, e me rincresarés se i ghes de catàs ensèma. Fidas l’è bé, mia fidàs l’è mèi, a mé me pias mia se me böta vergót en söl có. Sighète a pensàga.

Penansima) (Entrando) Vint vólte bundi maestro Pagìna, vulìv vègner con de nóter? Nóm a diertìs. Gh’è mia de perder sto spetacol. Don Ugo Pregadio, el farmacista, el g’ha sfidat Caius, el dutur frances. I farà a bòte. Enmaginìv, i s’è sfidacc a la box come du gnari e me faró de arbitro. Però górm embastit en gran bèl schers, j-óm mandacc en du posti, giü de na banda e giü de l’altra. Ghe sarà pròpe de rider (*si appartano*).

Tomaso) G’ho sentit dì che el dutur frances el tira serte castagne. Sèrte casolàde!

Penansima) Gna ai me temp gh’era mia de schersà. Ai me temp ucuria coragio e me ghe n’ie de vènder. Pensì che na olta me só batit con de quater ensema e garesev duzit vèder che ganci, che sinister, che casòcc, che sventole: j-ho facc scapà töcc quàter.

Tomaso) Nom, ma chèi du lé, pudie mia risolver la questiù a parole envece che fa na le mà?

(Escono Penansima e Pagìna.)

Franco) L’è mia tant fürb el maestro Pagìna a fidàs de sò móer, me ciape mia le ròbe isé a la lezéra Bisògn che stüdie vergót per sai se me fómna l’è onesta o no. Per sail bisògna che parle con sto tananai de cavalier (*idea*) me traèste e me presente sota el nom de... de mastro Rivoletto. Se me fómna l’è onesta ghe rimète gnènt, al contrare garó tribùlat per vergot (*esce*).

## Scena II - la locanda della Giarrettiera

Picinèla) (Entra.) Buon giorno cavalier Strinaròss.

Strinaròss) Buongiorno spuza.

Picinèla) Vardì che me só mia spuzada.

Strinaròss) Oh, alura buongiorno signorina. Vé ócor vergót?

Picinèla) Spere de mia distùrbà. Gh’iv tèmp per dò o tre parola cavalier?

Strinaròss) (Galante) Cara la me bèla tusa, töt el tèmp che vulì..

Picinèla) Cavalier, gh’è na certa siura, na certa certa Alice Forte... ma vignì en brìs pö en sa che no i sente... siv, me fó de cameriera al dutur Caius, (*spiegando con orgoglio*) el dutùr frances.

Strinaròss) Va bé, va bé, e alura sta siùra Alice Forte?

Picinèla) Se, pròpe lé, però vignì en bris en sà.

Strinaròss) Sti tranquila, sènt nüsü. Sti mia a preocupav, chèsta l'è töta zènt de casa, i conòse bé.

Picinèla) Ah de bù? Ve fidiv isé tant de la vòsa zènt?

Strinaròss) Me fide, me fide, e alura sta Alice Forte? De che se trata?

Picinèla) Ah, cavalier, ma vó cosa gh'iv adós per fa encantà isé le fómne? N'öciada e pamf.

Strinaròss) Alice Forte, la me dize de Alice Forte.

Picinèla) Vó l'ì mèsa en agitasiù. No l'ho mai vista isé agitada. E sé che ghe n'è stacc tanc che ghe faa la corte. Gh'è stat apó dei conti e dei baroni, töcc sö e mél, e regaii, e ór, e stòfe presiuse, ma lé gnènt! La j-a mandaa töcc a fas binidi.

Strinaròss) Va bé, ma a la fi de la sunada?

Picinèla) La g'ha ciapàt la vòsa letera e la ve ringrazia mile olte e la m'ha dit de div che el so òm el g'ha de nà via da le dò a le tre.

Strinaròss) Da le dò a le tre?

Picinèla) Sé, e le l'ha m'ha dit de div che alura pudì endà a véder chèl tal quàder, en ritrat me par, ma vó el sì de che se trata. Poera fómna con de un òm isé gelùs, la pasa le pene de l'inferno.

Strinaròss) Tra le dò e le tre. Va be, nì a diga che va bé. E salüdemela fis.

Picinèla) Va bé, va bé. Ah, desmentegae, apó la siùra Margì Pagìna le ve manda a salüdà. E la ma dit de div che el sò òm el va mia tant föra de casa ma che la ve la farà saì. Ma cosa ghe fiv vó a le fómne? Cosa duprìv, na qualch strolegàda?

Strinaròss) Machè strolegàda, só gna me, se vèt che g'ho amó en serte fascino, che só amò piaciùs.

Picinèla) (*Squadrandolo*) Per èser piaciùs siv amó piaciùs, v'el garantesce.

Strinaròss) Scüzìm, l'è mia che per caso le g'ha ciciaràt tra de lure e le s'è dide vergót de töt chèsto.

Picinèla) Sares en bèl schers de bu. Ma nó, j-è mia isé oche. Ah, la siura Pagìna la domanda se per piazèr pudiv mandaga vergü a tö vergót.

Strinaròss) Ma certo che ghel mande.

Picinèla) Mandìghel sübit che magari el fa de pustì fra voalter dù.

Strinaròss) La salüde siòra, èco, en picol penser, la tègne. Robin va con de lé, vaga ensema (*Escono Picinèla e Robin.*) Töte chèste novità le me fa deentà storno. Le me fa pèrder la trebisonda.

Bertoldo) (*Entrando con una bottiglia*) Ser Gioàn, gh'è zó en certo messer Rivoletto che 'l volarés parlaga ensèma, e per el distürbo el ve manda na bòsa de chèl bu.

Strinaròss) Come se ciàmel? Rivoletto? Fal vègner\_dènter. (*Bertoldo esce.*) Chi me porta na bòsa compagn el troa sèmper l'ös dèrvert. (*Sfregandosi le mani*) Ah ah, Alice Forte e Margì Pagìna staolta v'ho brincàt!

Franco) (*Franco Forte entra travestito da Rivoletto.*) Cavalier, i me ossequi.

Strinaròss) Prego, prego, de che se trata?

Franco) Scüzim se vègne a distùrbà sensa tante ceremonie.

Strinaròss) Nüsü problema, el se còmode.

Franco) Ser Gioàn, mé so Rivoletto e so en galantòm. En gentiluomo de campagna che g'ha spindìt e spandàt en möcc de solcc.

Strinaròss) En sach de solcc! Messer Rivoletto, chèsta l'è l'ocaziù per cunusìs mèi.

Franco) Cavalier, ghe dize sübit che so mia vignit a chèle ure ché e sensa avizà l'è mia per domandaga de le palanche.

Strinaròss) Le palanche j-è semper le palanche.

Franco) L'è vera. E ghe n'ho ché en scarsèla na bèla braca. E se vulìv, o töte o metà j-è per vó.

Strinaròss) El ringrasie siòr. Come mai l'è isé de maniga larga? G'hoi de fa vergót per guadagnale?

Franco) En piazèr, na stüpidada. Se gh'ì tèmpe te scultà, v'el dize.

Strinaròss) Dizim, se pòde apena apena.

Franco) Però vardì che l''è mia che me sape deentà mat töt de 'n colpo.

Strinaròss) G'ho capit. Nóm avanti.

Franco) A Riultèla ghe sta na siura. El sò òm el se ciama Forte. Franco Forte.

Strinaròss) E alura?

Franco) Mé so ennamurat de chèsta fómna. G'ho fat de töt per faghel capì, regai, or, fiur, ma le gnènt. G'ho sercat en töcc i modi de encontra la, ma lé gnènt. La völ mia saìghen de me.

Strinaròss) Ma, v'ala almen fat na qualch promèsa, ve l'ala dit ciar e nèt che le la ghe staa?

Franco) Mai.

Strinaròss) E l'iv almen sinsigada per capì se la ghe staa?

Franco) Mai.

Strinaròss) E alura siòr cosa pretèndel. El vòs bé l'è strösiàt.

Franco) El me bé l'era come na casa, mia costruida sö söl me teré ma fada sö, sö chèl de n'alter, isé g'ho përs töt.

Strinaròss) E perché siv vignit de me?

Franco) Adès ve spieghe. La zènt la dis che la siura en questiù, la par onesta. La par apena, perché con de me la fa la timida e con de vargü alter la malisiusa. Malisiusa al punto de fa ciciarà la

zent. Alura, vò cavalier Giàn Strinaròss, che siv en galantom dei prim, coragius e ghiv pòra de nüsü, e oltre che a èser en bèl òm, siv braó a cöntala sö. A töt chèsto le fómne j-è sensibii.

Strinaròss) Via, messer Rivoletto!

Franco) Cridim, ma só pö che sicür che vò el siv za. Ecó, chèste j-è palanche, en möcc de palanche, spindi e spandì come nì òja. En cambe ghi de regalam en bris del vòs temp. Ghi de faga la corte a la moer de Franco Forte. Vò siv en gamba, bu ‘mburtulàla sö e fala ‘nnamurà. Se ghe un òm brao en chèsto siv pròpe vò. E só sicür che en quàter e quatrott la ve casca ai pè compagn de ‘n per madür.

Strinaròss) Capise mia, la facenda l’è ‘n pò strrrana. Se siv vò che ghe vuliv bé, me che ghe c’entre?

Franco) Sirchi de capì endó vöi rià. Quan che la parla con de me, sómea che la sape tacada come en bis al so unur e isé me só pö che diga. E pò, quan che la varde me se piega i zenöcc e me se encòla la lengua e só pö bu de di gnènt. Se envece me ghes de viga le pröe che apó a lé ogne tant la sbrisia, podares faga vèder che el só che l’è mia töt ór chèl che slüs. E troares la forsa de diga che se la ghes de sbrisia apó con de me sares contènt. Che me rispundiv cavalier?

Strinaròss) Alura, messer Rivoletto, en tant per ambià gracie de le palanche. Affare fatto.

Strenzómes la ma, ve empromète, parola de galantòm, che, en quàter e quatrott, la moer del siòr Franco Forte la ve cascherà compagn de ‘n per madür, longa e tirada ai pè.

Franco) Gracie fis cavalier.

Strinaròss) El ribadise: la ve cascherà compagn de en per madür, longa e tirada ai vòs pè.

Franco) Per fala cascà, spindì pör töte cheste palanche e se ve n’ocor amó, no ghi che parlà.

Strinaròss) Che bèle sbrisiate la farà con de vò, messer Rivoletto. L’è en mester za fat. Ve dizaró de pö: poch prima de vò gh’è vignit na comar a fisam ‘n apuntamènt e la l’ha mandadalé. Garó de catàm con de lé tra le dò e le tre, a chè l’ura lé chèl tangher gelus del sò òm l’è föra casa. Turnì de me stasera e ve cöntaró come che madüra töta la storia.

Franco) G’ho fat bè a vègner a sircav. Sì l’òm giöst che me ucuria. Scüzim cavalier, el cunusiv vò sto tal Franco Forte?

Strinaròss) Poèr diaól d’un bèch. No, el conòse mia. E fo mal a ciomal pór perché i m’ha dit che sto cornuto l’è en sioràso piè de palanche. E sò moer la me enterèsa apó per chèsto. La dopraró come ciaf per dèrver la sò casaforte. E dopo faró festa, ma festa granda.

Franco) Sares stat mei se ‘l cunusièv sto Forte, per regolàv e pudì cambia stada e mia encontral.

Strinaròss) Ma che ‘l se ‘mpiche lü e i sò sólcc. A me, el me fa gna cald e gna fred chèl vilàn quàder sensa creansa. N’óciada de le me e lü el narà vià schìs compagn de en pòlès. Se crèdel nobile? Ghe zontóm n’alter titol a chèl bifulch: bèch. Sò fómna la sarà vòsa mastro Rivoletto, vignì de me sot sera (*esce.*)

Franco) Strinaròss e me móer! Chi l’ares mai ennamginàt! Me moer l’ha ga dàt ‘n apuntamènt a chèl tripù, a chèl pajaso de ‘n cavalier. Ni a fidav de le fómne voalter! Maestro Pagìna l’è un àzen fat e finit a fidas de sò fómna. Gelus! Per forsa só gelùs! I vòl fam bèch! Ghif capit i furbaciù, i vòl fam bèch. I me sentirà töcc. Ghe la faró pagà, e pagà salada, e sensa pèrder tèmp. Ghe la faró pagà! I vòl fam bèch, bèch, bèch (*esce.*)

### Scena III – un campo in località Pigna

Caius) (*Entra*) Te, Giani Balù!

Balù) (*Entra*) Sior padrù?

Caius) Che ure èle adès Balù?

Balù) L'ura l'è za pasada. Don Ugo Pregadio el garées de èser stat ché de en bel pès.

Caius) *Parbleu*, Giani Balù, ghet vist, l'è mia vignìt. El se la sarà fada sota da la pora. Gares dàt na mà de bòte a sto farmacista. Ghe nares dàt en fraco e na sporta de ricordas fin che 'l scampa.

Balù) Lü el la sia che vó sif tògo a menà le mà, a tirà de box. Quàter lèche de chèle giöste e 'l sares finìt lónche tiràt zó en tera.

Caius) *Diable*, lares slongat isé, va che te fó vèder.

Balù) Padru, div na calmada, me so mia bu de tirà de box.

Caius) Fatti sotto, calabraghe!

Balù) Fermo, gh'è dré a rià de la zènt.

(*Entrano Penansima, Zìgol e Pagìna.*)

Penansima) Salve, dutùr Caius. Che el Signur el ve mantegne en salute siòr dutur.

Tomaso) Come nómi caro dutur?

Zìgol) Salve dutur.

Caius) Cosa siv vignicc a fa ché en... giü, du, tre?

Tomaso) Sòm vignicc a véder el vòs gancio dèster e chèl mansì. Le finti, le parade...

Caius) *Diable!* El g'ha gna il coragio de mitiga el müs. Voalter me siv testimoni che me so stat ché dò ure a spétal e lü l'è mia vignìt. El s'è mia fat véder chèl cagasotto, chèl pelabroch.

Penansima) Dutur, lasì pèrder. J-è mei le bèle maniere che le bröte. A fa nà le mà nó se n'è mai risulvit gnènt. El mia vera maestro Pagìna?

Tomaso) L'è prope isé giudice Penansima.

Penansima) L'è che me adès só vècc e fo el giudice di pace, ma quan che sie zuègn g'ho fat apò me le me bèle scasotade.

Tomaso) L'è vera, l'è prope en pecat deentà vècc.

Penansima) Dutur Caius, só vignit per portav a casa. So giudice di pace e so vignit per fav fa la pace. Nòm, vó si en brao dutur e don Ugo l'è en brao farmacista e si mia pö du gnareli.

Tomaso) (*A bassa voce, agli altri presenti*) Alura, prima de töt, sior giudice endì col cavalier Zìgol enfin a San Zé, taì zó entraërs i camp che fi prima.

Zigol) Sorbole e ratolorum! Don Ugo alura l'è a San Zé?

Tomaso) L'è là, vardì come che la ghe gira. Se 'l s'è calmat riáró col dutur. Va be?

Penansima) Va bè, stiv mia a preocupav. Faróm chèl ghe gnì dit.

Penansima e Zigol ) Ve salüde (*Escono.*)

Caius) *Diable*, me el còpe lüle, el taje sö a fitine, el völ fa de sensàl tra la bèla Anna Pagìna e na sömia, ghe n'è amó de sènter.

Tomaso) Envece che sta ché al frèt e a pèrder tèmp, sarés mia mèi che nà a catà la signorina Anna?

Caius) *Parbleu*, parlìv mèi de en libèr stampàt. Ma chèsta l'è na questiù de unur: la vé prim de töt.

### ATTO III

#### Scena I - un campo in località San Zeno

(Entrano don Ugo e Pierino.)

Don Ugo) T'el domande amó na olta, Pierino se pöl saì endó te set nat a sercal? Set sicür de il mia vist sto dutur Caius dei me stiài?

Pierino) Só nat en giro de per töt, so riat enfin a la Candilina, e pö zó amó, e pò de la banda de ché, per poch no riae a Montunàl.

Don Ugo) Alura fam en piazér, ria enfin a Montunàl.

Pierino) Va bé, va bé (*Va a parte.*) Endó.

Don Ugo) (*Canticchia.*) Envece de cantà, carés de piànzer. Só gna me che pensà. Se èser content che el s'è mia fat véder o encasàt perché l'è mia vignit.

Pierino) (*Rientra.*) L'è dré a vègner de chèla banda don Ugo.

Don Ugo) Peh! Che 'l se comode pör, me só ché (*Canticchia.*) - Ai ruscelletti alle cui cascate... - Iddio protecca i ciusti!

Pierino) L'è dré a rià col me padrù e con giudice Penansima. J-è za dré a traesà i binare de la ferovia. Però el dutur Caius el vède mia.

Don Ugo) Per piazér, té a portada de ma i me cuantù de la **pox**.

(Entrano Pagìna, Penansima e Zigol.)

Penansima) Buondì don Ugo. Allora? Chi ria a tègner en zögadur de lons dei dadi o en stüdent de lons dei liber el pöl zabela dì de viga fat quasi en miracol.

Zigol) (*A parte*) Ah, la me cara Anna Pagìna.

Tomaso) Ve salüde apó me don Ugo.

Don Ugo) Ehh, saluti, saluti a töcc.

Penansima) Ma che? En farmacista coi quantù de box, ghe n'è amó de frèscche de véder.

Tomaso) E pò: vistit compagn de en zerbinòt.

Don Ugo) Me vèste come che n'ho òja. Cosa el che vuliv de me?

Tomaso) Som vigni a sercav, apena, per fa na buna asiù, siòr farmacista.

Don Ugo) Pravi, cuadagnari el paradìs. E de che puna aziù se trata?

Tomaso) Zó là en font gh'è en galantom, vergü i g'ha fat de tort e adès lü, nonostante chèsto el volarès s-ciari le ròbe e fa pace.

Penansima) Sòrbole, g'ho quasi 80 agn ma nó g'ho mai incontrat giü compagn.

Don Ugo) E chi sarésel sto tal?

Tomaso) El cunusiv siòr farmacista, el cunusiv. L'è el nòs dutur frances, el dutur Caius.

Don Ugo) Nò, che crède gna se el fos vera.

Tomaso) E perché mai?

Don Ugo) Lulé l'è el sarà apò en dutur ma l'è en cacasoto, en calaprache, en cran vigliach, en faraputo, a giü compagn se carés gna de strinzica la ma.

Tomaso) L'è prope vera che el dutur e 'l farmacista i vulia menàs.

Zigol) Ah, la dolce Annetta!

Penansima) Metomes de mès e tegnomei separacc, giü de na banda e giü de l'altra. Eco che riva el nos dutur Caius.

(*Entrano Caius e Balù.*)

Tomaso) Sö, basta adès. Don Ugo, el mète via sti quantù de box e fomela finida.

Penansima) E apò vó caro dutur.

Caius) (*A parte a Ugo*) Pòde div na parola en de na ricia? *Diable*, me g'ho amó spür a le mà e so semper pront ma vó me par che ve tirighe endré.

Don Ugo) (*A parte a Caius*) Spetì en momènt che dopo ve spieghe. (*Forte.*) A la fi si riàt.

Caius) *Parbleu*, sif pròpe 'na sömia 'maestrada, en cagasoto, en bastard, en vigliach.

Don Ugo) (*A parte a Caius*) Per piazer stom mia a fas rider dré. Vedari che en de na maniera o en de n'altra saró **pu** de fam perdunà. (*Forte.*) Se nì avanti isé ve spàche chel vòs có de raarì.

Caius) *Diable!* Coso, ehi Balù, dighel se l'è vera o nò che me l'ho spetàt endó ghiègn dit e sie dispost a fa sö polpète. *Parbleu*, e g'ho spetàt apò en bèl pès.

Don Ugo) Nò, l'era ché endó caresègn duzìt catas. Dizichel vó se l'è vera o nò. E me che sère.

Tomaso) Calma, calma caro el me farmacista. Calma apó a lü dutur. Vó embrojat töcc du. Vó mandàt giü de na banda e giü de l'altra. Gh'è mia bisògn de fa nà le mà per sistemà le ròbe. Le ròbe l'è mèi sistemale deanti a en bèl biceròt de vi. Nóm töcc a beèr en góto de chèi giösc. Vignim a dré siòri.

Caius) *Diable!* Che sirvili! Che có! Che bèla pensada!

Penansima) Nóm siòri, nóm, stom mia a pèrder tèmp.

Zìgol) Oh, la mia dolce Annetta! (*Escono Penansima, Zìgol e Pagìna.*)

## Scena II - una strada di Rivoltella

Franco) Sicür come la mórt che cataró en de la me casa el cavalier Strinaròss. Ater fat che bale. El me l'ha dit lü. Só pö che sicür de catàl. L'è mei che me peseghe.

(*Entrano Pagìna, Penansima, Zìgol, don Ugo, Caius e Balù.*)

Penansima, Pagìna e altri) Chi se vèt, el siòr Franco Forte.

Franco) (*A parte*) Pròpe na bèla compricola (*Forte.*) Siòri, en casa g'ho del salàm nostrà de chèi speciai, vignì töcc a tastàl, ve envide töcc.

Penansima) Siòr Franco Forte, ghi de scüzam, sarà per n'altra ólta.

Zìgol) Scüzim apó me. A dì la verità, som stacc evidacc da la cara Annetta, e gna per töt l'oro del mond pòde mancà.

Penansima) L'è 'n pò de tèmp che se parla de embastiser sö en vergó tra l'Annetta e me niùt Zìgol. Encó se gares de sai a che punto che j-è le ròbe. Encó sò pàder el gares de dign sé o nò.

Zìgol) Sperom che sò pàder el dize de sé. Dizaràl de sé maestro Pagìna?

Tomaso) Sé, sé, sti tranquilo. Vó me piazif, sul che a me moer ghe pias de pö el dutur.

Caius) *Diable!* L'è de me, alura, che l'è enamorada. La me l'ha garantìt apó comar Picinèla.

Don Ugo) Nom apelase, stiv mia desmentecav de en tal zuinòt. Endó el lasiv compar Maltafina? Lü, l'è prao de palà, de cantà, el scriv poesie e l'è semper profumàt. Sti atenti che no el ve freche, el fato l'è che lü l'è zuen, e la zuentü la vensi sèmper.

Balù) E pò, gh'è de dì che Maltafina oltretöt l'è mia sèmo.

Tomaso) A me el me pias pròpe mia. L'è poarèt come la gaia, l'è semper löster come en spècc. Lüle el ghe meterà mia le mà söl me capitàl, ve'l garantése mé. Voarì mia che el paghe i sò debicc coi me sólcc. Le me palanche le narà a chi dize me.

Franco) Siòri, per piazer, almen vergü vignì a casa mia, oltre al salam nostrà faróm baldoria. Vé farò veder en vergót de special. Almen vó maestro Pagìna, e vó sior dutur, e vó don Ugo.

Penansima) L'è mia na catìa pensada, nì, nì pör vóter. Sensa de lur garóm mia le mà ligade e podaróm faga la corte come ghe nóm vòja. (*Escono Penansima e Zìgol.*)

Caius) Va a casa apò te Balù, me vègne dopo.

Balù) Vóra dì che en del turnà a casa me fermaró a la locanda a beer en bèl bicerot de malvasia col Cavalier Strinaròss. (*Esce Balù.*)

Franco) (*A parte*) Brinde me prima de lü col cavalier, e pó el faró balà come dize me (*ad alta voce*) Alura, nóm siòri, che el salam nostrà el gne speta?

Tutti) Forza, nóm a mangià na fèta de salam e a veder che sorpresa che el gna preparat el sior Forte. (*Escono.*)

### Scena III - la casa di Forte

Alice Forte) (*Entra*) Ehi, Tone! Ehi, Batista! Sö sö, svelti. Gh'è mia tèmp de pèrder!

Margì) (*Entra*) Svelti, svelti la sista de la bögada.

Alice Forte) (*Chiamando*) Ehi, Robin, alura!

(*Entrano Tone e Batista con una cesta.*)

Margì) Alura! Sö nòm, svelti, svelti.

Alice) Postìl ché.

Margì) Disìga a la svelta chèl che i g'ha de fa. Góm de pesegàs.

Alice) Tone, Batista, scultim bé. Come vó za dit, vòter stì scundìcc lé de dré. Quan ve ciame, vignì sübit de cursa. Pò de ónda ciapì chèsta sista de la bögada e nì dricc filàcc enfin zó al pòrt de Riultèla. Sensa sta lé a pensàga sura tant la vüdì en de l'acqua del lach, e dopo turnì a casa.

Margì) Chi capìt bé?

Alice) (*A Margì*) I g'ha capìt, ghe ló za ripitìt sènto olte. (*A Tone e Batista*) Adès nì e vignì quan ve ciame. (*Escono Tone e Batista.*)

Margì) Èco che ria el so garzü: Robin. (*Entra Robin.*)

Alice) Dì, tridizi, gh'è na qualche novità?

Robin) El me padrù, el cavalier Gioàn Strinaròss l'è a la porta dedré comar Forte e el völares vidìv.

Margì) Ehi te, stranfugnì, te saré mia nat a cöntaga töt per caso?

Robin) No, vel züre. El me principal el la sa mia che vó siv ché. Ansi, el m'ha proibìt de parlàv ensema e el m'ha dit che se ve dizie vergót a el m'arés licensiàt.

Margì) Bravo el me zuinòt. Bóca serada no la ciapa mosche. Mé vo a scundim.

Alice) Va, e te (*A Robin*) va a diga al tò padrù che só che de sula. (*Esce Robin, a Margì*) Te ricordèt bé quan che te ghe de vègner föra?

Margì) Certo che me ricorde, ma se ghes de desmentegam fam na fifulada.

Alice) E alura via. Sistemom sta angüria come la merita. (*Esce Margì Pagìna.*)

Strinaròss) (*Entra.*) “Alfin t'ho colto, mio celestial gioiello” ? Adès pòde apò mörer che só za scampàt asé. Ghe nó vit asé de iv vist.

Alice) Che bèle parole, el me fa deentà róssa cavalier!

Strinaròss) Comar Alice Forte, so mia bù de fa tanti giri, de ricamà sö le parole, ve dize apena che volarés che vó fosév vedova, e ve zùre davanti a Dio che me sares pront a spusav.

Alice) Spuzàm cavalier? Nò, sarés mia na spuza degna de vó.

Strinaròss) En töta la provincia de Bresa no ghe n'è n'altra compagn de vo. I vòs occ i stralùs de pö dei diamanti. La vosa front l'è lisia come l'òio e quan caminèv sbalonzoliv töta e a vidiv, el me cör el sbalonzola per vó. Sota el foulard i vòs caeei i par enfin facc de seda fina.

Alice) L'è apena en fasöl che j-a te fermi. En fasöl sensa pretese.

Strinaròss) Stì mia di isé. Vó garesev de viga töt el mond ai pè tanto siv bëla e stralüsenta.

Alice) El staghe mia a dì isé, cavalier.

Strinaròss) Me só enamurat de vó perché siv special. No gh'è parole per div quant che siv bëla, me ve vói bé, so enamurat. Vò apena me fiv bâter el cör. Vó apena siv degna del me amur.

Alice) Eh, via cavalier! Me apena? L'è mia che per caso vo siv enamurat apò de la comar Pagìna?

Strinaròss) La comar Pagìna no la me dis gnènt, la me pias mia e nó la vores gna se i me la regala.

Alice) Va bé, se ghe só apena me, volarà di che saró costrèta a fa en pensierino.

Strinaròss) Gh'ì mia de pensà. L'amur el nas dal cör mia da la mènt. Dirvì el vòs cör e dimèl en mà a me che el tegnaró bël strèt.

Alice) El tignariv semper bël strèt? Sicür che no gh'è pericol che 'l casche en tera?

Robin) (*Da dentro*) Alice Forte, Alice Forte! (*entra*) Gh'è comar Pagìna sö l'ös, la g'ha j-öcc föra del có, l'è straolta e la volarés parlàv sübit.

Strinaròss) La g'ha mia de vidim. Me sconde ché de dré.

Alice) Ah sé, sé, per piazèr, che no salte föra dei gioedé. (*Strinaròss si caccia dietro l'arazzo.*  
(*Entra Margì Pagìna.*) Alura? Cosa gh'è sücès?

Margì) Oh comar Alice, cosa ghiv mai fat? Cosa v'è vignit en mènt? Cosa cridiev de fa? Adès ghiv mandata a le urtighe la vosa reputasiù. Sariv disunurada per semper.

Alice) Cosa siv dré a dì comar Margì?

Margì) Encó l'è en dé de scancelà dal calendare. Se va mia a sercà el frèd per el lèt quan che se g'ha un óm compagn del vòs. Gelùs come che l'è, se va mia a mitiga i pölès en de le rìce.

Alice) Quai pölès? El g'ha gnèt de sospetà.

Margì) Sospetà? Ghiv de vergognav! E me che ve fae na fómna onesta.

Alice) Comar, dizim cosa gh'è dré a süceder per carità!

Margi) Gh'è dré a rià el vòs òm, l'è dré a rià de cursa, el dis che ghiv fat vègner denter un òm en casa. Che ghiv spetàt apostà che lü el naès vià. Se 'l la cata siv ruinada per sèmper.

Alice) Speróm de nò.

Margi) Prighì el Signur che el sape mia vera che ghiv un òm en casa. Se el vòs òm el la cata el la cópa. Só curida a dìvel, se gh'è töt aposto mèi per vo, se envece ghiv en casa 'n amico, sti mia a pèrder la calma casil vià. Fi en módo che el la cate mia o sarì ruinada per sèmper.

Alice) Che gói de fa? A dila töta el gh'è de bu en galantòm che l'è vignìt a catàm. L'è mia per me, l'è per lü che g'ho pora. Se el me òm el la cata, gelùs come che l'è, l'è bele bù de copal.

Margi) El vòs òm l'è dré a rià. Ghì de scundil. En casa nò, l'è mia possibil, ghi de fal na föra sensa che el vòs òm el se n'encorze. Vardì sto gran sestèl? E se ghesem de scundil denter lé. El quaciòm cola ròba spurca, chèsti j-è pròpe i dé de la bögada el vòs òm el ghe farà mia bado. El fóm trasportà dai servidùr enfin al lach e se ne encorzerà nüsü. Gna la zènt la ciciarerà

Alice) L'è tròp gròs per enfrognàl lé denter. Che se pöl fa?

Strinaròss) (*Sbucando fuori*) Fim vèder a mè, fim véder a me. Lasim próa se ghe stó. Ghe stó, ghe stó, en pó strèt ma ghe stó. Se ócor tratègne el fiat e riáró a pasaga.

Margi) Beato cielo, el cavalier Gioàn Strinaròss? E me che cridìe a le vòse letere cavalier.

Strinaròss) Só embertùnat còt de vó, però ades aidim a scapà. Vardom se rie a nà dènter... (*Si ficca nella cesta; lo coprono co' panni sporchi.*)

Margi) Ròbin, aidem a quarcia zó bé el vòs padrù, e vó comar ciamì i vòs servidur, sö svelta.

Alice) Fürbo el cavalier! (*Chiama*) Tone! Batista! Tone! (*Entrano Tone e Batista.*) Purtì via la sista de la bögada, ve racomande, riì enfi al lach. Peseghiv, sö de brai.

(*Entrano Franco Forte, Pagìna, Caius e don Ugo.*)

Franco) Dènter e vedarì se ghie rezù o nò. Se me saró sbagliàt tulim pör en gir, l'aró meritat. Endó siv drè a nà voalter co' sto sistèl?

Tone ) Zó al lach...

Batista) Ghè denter l'è ròba spurca de laà

Alice) Che ve emporta endó che i va? Volarì mia mitiga el bèch apò el de la bögada adès.

Franco) Beck! Ah, se ghe fos apena el bèch en de la bögada! Bèch bèch bèch. Sicür: bèch diaol porsèl. La ghe volareé de bù na bèla bögada. (*Escono Tone, Batista e Robin con la cesta. Franco Forte chiude la porta a chiave.*) Dò mandade. Chèste j-è le ciaf. Nom, fom pasà töte le stanse, vardom empertöt. Stanom la volpe. Sö, nóm en sirca del vulpù.

Tomaso) Siòr Forte lasì perder, siv drè a fav de tòrt. Sti mia fa rìder la zènt. Lasì pèrder.

Franco) Pòde mia lasà pèrder, nom de sùra a véder. Nom, vignìm dré a me (*esce*).

Don Ugo) L'è pès de Otello, no g'ho mai vist na gelosia compagn.

Caius) L'è perché ché som en Italia, en Francia no gh'è nüsü de gelùs.

Tomaso) El siv che fom? Nomega dré, vardom se el riarrà stanà sta volpe, mèi amó, sto vulpù.

(Escono Pagìna, Caius e don Ugo.)

Margi) Oh, el schèrs l'è deentàt amó pö bèl. En pratica j-è du schèrs.

Alice) So mia se me piàs de pö el schers fat al me òm o chel fat al cavalier Strinaròss.

Margi) Chisà che pora che 'l g'ha ciapàt quan che el vòs òm el g'ha domandàt de la sista.

Alice) Dopo chèl che gh'è süces el garà de sicür bisògn de en bel bagn. Batil en de l'acqua del lach no pöl che faga bé.

Margi) Bröt spurcaciù, bröt tànger. L'era ura che 'l catàes chèl del formai!

Alice) Come garal fat el me òm a sai che gh'era ché el cavalier. No l'ho mai vist isé gelus, el ghia j-öcc fora del có.

Margi) Góm de nà a fònd a la ròba e véder come che 'l g'ha fat. Magari entant se pöl fa amó en qualche schers al nòs cavalier. Giü apena 'l basta mia. Per furtuna som en carneàl.

Alice) El set che fom? Ghe mandom amó na olta comar Picinèla co' le nòse scüze. Ghe dizóm che som dispiazide fis de chèl che gh'è süces. Ghe dom amó na qualch speransa e lü, vanitus come che l'è, el ghe casca e nòtre el sistemom per le feste la seconda ólta.

Margi) Sé, faróm isé: ghe mandom le nòse scüze e el mandóm a ciamà per le òt de dumà matina.

(Rientrano Franco Forte, Pagìna, Caius e don Ugo.)

Franco) Rie mia a catal. Chèl bröt pansù el s'è vantàt endàren.

Margi) Beato cielo! (A parte a Alice Forte) Ghiv sintìt?

Alice) Bel modo de tratàm caro el me òm, ve par mia?

Franco) Sé, me par.

Alice) I vòs pensér j-è mia stacc tant bèi.

Franco) Amen!

Margi) Ve fi de tort, siòr Franco Forte. Ve fiv en gròs tort.

Franco) Se vèt che 'l merite.

Don Ugo) No ch'è nüsü en casa, cóm vardat empertöt, en töte le stanse, en dei vestare, en de le casse, nei casitù. Nüsü!

Caius) *Diable!* Gna mé g'ho catàt nüsü. E sé che g'ho vardàt empertöt.

Tomaso) Garesev de vergognav siòr Franco Forte. Qual demonio, qual spirit malign v'ha pudìt sornav en del có sta somènsa? El vós có el volarès gna per töt l'ór del Castel de Desensà.

Franco) Sarà mia bèl, mastro Pagìna, però pòde faga gnènt.

Don Ugo) Vòsa fómna l'è na fómna onesta. E che n'è mia tante de oneste compagn de lé.

Caius) Pö onesta de lé no ghe n'è altre.

Franco) Ben, v'ho emprumitìt el salàm nostrà, però nom prim a fa du pas che me calme. Per adès perdunim, ve spiegaró n'altra olta perché me so comportàt isé. Vignì apò vò comar Margì, vignì con de nòter e sirchì töcc de perdunam.

Tomaso) Nom siòri (*A parte.*) Adès sé che podóm töl en gir per en bèl pès. (*A tutti*) Nóm siòri.

Franco) Nom maestro Pagìna, nom. (*Escono tutti.*)

## INTERVALLO

### **Scena IV - La casa di Pagìna**

(*Entrano Maltafina e Anna Pagìna.*)

Maltafina) El siv che vòs pàder el pòl mia vidim. Sti mia mandàm de lü, stèla cara.

Anna) E alura, che fóm?

Maltafina) El dis che g'ho le ma sbüse e g'ho mangiat föra töt el me patrimone. L'è vera. Lü el pensa che mire ai sólcc, ai sò sólcc, e chèsto l'è mia vera. El sèghita e menala. El dìs che l'è emposibil che me ve vòle bé per chèla che sif, ma che ve vöi bé per chèl che ghif.

Anna) Forse l'è la verità.

Maltafina) No, l'è mia isé. Per dila ciara e tonda, se de prensépe pòl vèser stat le palanche a muim, adès che v'ho cunusit me n'emporta gnènt dei sólcc. Dènter de vò gh'è en valur pö grand de töcc i sólcc del mond. E l'è chel che me vöi, e che vöi apena per me.

Anna) (*A parte.*) Caro Maltafina, pruì a naga dré a me pàder co' le bune maniere, siv mia bu de lisiàl? Sirchì de faga cambià idea. Se envece... vé en sa che gh'è zènt.

(*Si ritraggono continuando a parlare. Entrano Penansima, Zìgol e Picinèla.*)

Penansima) Comar Picinèla, domega en tai. Lasì parlà me niut Zìgol.

Zìgol) Vöi proà almen en per de ólte per véder chèl che sücèt.

Penansima) Sta mia lasàt mèter en sudisiù.

Zìgol) Machè sudisiù, só bu de fam entènder, l'è che g'ho pora.

Picinèla) (*Ad Anna*) Cara la me Annetta, gh'è mastro Zìgol che 'l vòl div na ròba.

Anna) Vègne. (*A parte.*) Chèsto l'è chèl che 'l g'ha en pansa me pàder. Mia sèmper I sólcc i scond töcc i difècc. E ché ghe n'è en möcc... de difècc, mia de sólcc.

Picinèla) Come nòmi mastro Maltafina? Pòde div na parola?

Penansima) (*A Zigol*) Ecó, la ria, sö sta mia fa el timid Zìgol, coraggio! Ah caro el me tus se ghe fós ché amó tò pàder!

Zìgol) Me pàder sé che l'era togo madamina Annetta. Me zio el podarés cöntan de bèle. Zio diga de chèla òlta che el g'ha robàt tre oche en de en polér a Vacaröl.

Penansima) Lasa pèrder i polér Zìgol. Só sicür che l'Annetta la ve völ bé lo stès apò sensa polér.

Zìgol) Sòrbole! No ghe n'è n'altra compagn de madamina Annetta en töta Rioltèla.

Penansima) El ghe farà fa la vita de na gran siòra.

Zìgol) De na sioràsa, ghe 'l garantése.

Penansima) E me ghe darò i camp che g'ho 'n Lögana, chei de San Martì e töcc chei de Sentenér.

Anna) Caro giudice Penansima, lasì che 'l parle, lasì el sape lü a fam la corte e mia gó.

Penansima) Ghet sintìt Zìgol? Ghet vist come che l'è bendisposta. La völ parlàt, ve lase de sui.

Anna) Alura mastro Zìgol?

Zìgol) Alura madamina Annetta...

Anna) Cos'el che vulì fa de bèl? Quale èle le vòse volontà?

Zìgol) Le me volontà? Chèsta l'è bèla! Sò gnamó en vècc rimbambìt per scrier le me volontà. Grasie al ciel gho amó le prime rice.

Anna) Vulie dì, mastro Zìgol, cosa pòde fa per gó? Cosa vuliv de me?

Zìgol) A div töta la verità, de gó volarès pòch e nient. Se sarà destino bene, sedenò pasiensa, auguri a chi sarà catàt föra. L'è stat vòs pàder e me zio a muìs. Domandiga a lur come che sta le ròbe. Domandìghel a vòs pàder che l'è prope dré a rià.

(*Entrano Tomaso Pagìna e Margì Pagìna.*)

Tomaso) Cara la me tusa, ghiv de vuliga bè a mastro Zìgol. Cosa ghe fal ché compar Maltafina? Chesto dènter e föra el me dà fastide. Siòr, ve l'ho za dìt: me fiöla l'è za promèsa.

Maltafina) Via, maestro Pagìna, en bris de pasiensa.

Margì) Caro Maltafina ghi de mocala lé de sinsigà la me pütina.

Tomaso) L'è na tusa che a vo la ghe se fa mia.

Maltafina) Vuliv almen scultam en minüt! Pòde dì almen 'na parola?

Tomaso) No, caro compàr Maltafina el siv come la pense, sti mia a fam de tòrt. Dènter dènter giudice Penansima, e pò a lü mastro Zìgol el vègne, dènter, cumudìv.

(*Escono Pagìna, Penansima e Zìgol.*)

Picinèla) Sarà mèi che parle co la comar Margì Pagìna.

Maltafina) Gentile comar Margì Pagìna, me ghe vöi bé a vòsa fiöla. Ghe vöi bé sensa tancc resói e sensa tante manfrine. Ghe vöi bé e basta. Dizim che pòde sperà, dizim che me dizare de sé.

Anna) Cara mama, per carità del cielo, sti mia fam maridà a chèl rimbambìt.

Margì) Gna dile per schers serte ròbe. Per te g'ho en mènt vergü de mèi, vergü bé empiatàt.

Picinèla) (*A parte*) L'è dré a pensà al me padrù, al dutùr Caius.

Anna) Poarèta mé, chèl che me spèta.

Margì) Sti mia a pensaga, compar Maltafina. Nò ve saró né pro e né contra. Prima parle con de me fiöla, en base a chèl che la me dirà decidaro. Però entant lasom le ròbe come le sta, che sò pàder nó 'l daghe föra de mat per niènt.

Maltafina) La salüde gentile siòra. Addio, Nannina.

(*Escono Margì Pagìna e Anna.*)

Picinèla) Chesto l'è töt per mèrit me. "Ma come" g'ho dìt "vuliv strösià vòsa fiöla con de en deficiente compàgn, con de en vecio bacuco de dutur ernsiminìt? Ma liv vardàt bé messer Maltafina?!" L'è töt mèrit me.

Maltafina) Grasie, gracie Picinèla, e per piazer, riárésela mia a portaga chèst'anèl a la me Annetta? Chèsto l'è per el disturbo.

Picinèla) Che el ciel el ve ricompense (*Esce Maltafina.*) Che zuinòt de cör! Epure, sarés mia chi catà fora per madamina Anna, se mastro Zigol, el dutur o chèsto Maltafina. Stom mia a ciapala calda. Ghe pensaróm sura. Entant nó dal cavalier Strinaròss a diga chèl che le m'ha dit le dò comar Forte e Pagìna. (*Esce.*)

## Scena V - l'osteria della Giarrettiera

Strinaròss) (*Entra.*) Bertoldo! Ehi, Bertoldo.

Bertoldo) (*Entra.*) El comande siòr padrù.

Strinaròss) Va a töm na scödèla de vi brulè, g'ho bisògn de scaldàm. (*Esce Bertoldo.*) Saró mia riat a la me età per fam fa fesso en chèsto modo. Bötam en del lach compagn de 'n predù. Menomal che se tocàa coi pè sedenò sares negàt. Però g'ho biit lo stes en möcc de acqua spurca, prope chèla dei squadrù endó che le fòmne le laa. Me ve amó de gómit.

Bertoldo) (*Entra col vino.*) Gh'è ché comar Picinèla, cavalier, la garés de parlà con gó.

Strinaròss) Zontomega en pó de vì a töta l'acqua del lach che m'è restat en pansa. Prima bée, g'ho la pansa zelada come se ghes majàt bàle de neve. Dopo fala vègner dénter.

Bertoldo) Comar, dènter.

Picinèla) (*Entra.*) Buondì cavalier, el me scuse se me só permësa de vègner a disturbav.

Strinaròss) Porta vià e va a preparàm amó na bèla scödèla de vi brulé, bel cald. (*Esce Bertoldo.*)  
Alura comar?

Picinèla) Cavalier, mé vègne perché m'ha mandat comar Alice Forte.

Strinaròss) Ah, comar Alice Forte! Rèste de gias. Za ghie frèd prima adès só pès de ‘n pinguino.

Picinèla) Ahimè! Lé poarèta, de chèl che gh’è sùcès, no la g’ha gna culpa gna pecà. I servidur i g’ha capità Roma per Toma. Se ghe sev vist come che la g’ha samàt con de lur. La ghe n’ha dit de côte e de crûde.

Strinaròss) A dì la verità gna me g’ho capità bé chèl che gh’è sùcès. Forse g’ho fat mal a fidam de giöna che la g’ha mia töte le fasine al quèrt.

Picinèla) El staghe mia a dì isé cavalier. Lé, l’è rincrisida fis, poarina l’è isé zó de moral che magari a vidiv la se tira sö en bris. La m’ha dit de div che stamatia el so òm el va a cacia. E lé la ve spèta tra le òt e le növ. La ve farà le scüze, però adès, g’ho de portaga na risposta.

Strinaròss) Va bé, naró a catala, diziga che el fó apena perché só ‘n òm de parola.

Picinèla) Ghel dizaró.

Strinaròss) Braa. Diziga che turnaró da lé. Tra le òt e le nöf?

Picinèla) Sé, en tra le òt e le nöf cavalier.

Strinaròss) Va bé, nì a diga che rie.

Picinèla) Ve salüde, stím bé cavalier (*esce.*)

Strinaròss) Me domande e dizé come mai messer Rivoletto el s’è gnamò fat véder. El m’ha mandat a dì de sta en casa che el sarés vignìt. I sólcc j-è sólcc. Menomal, èco che ‘l ria.

Franco) (*Entra in veste di Rivoletto.*) Salve cavalier.

Strinaròss) Siòr Rivoletto, siv vignìt a sai chèl che gh’è sùcès fra me e la moér de Franco Forte?

Franco) Só töt e só vignìt apostà per chèsto, cavalier.

Strinaròss) Vardì, messer Rivoletto, che me sie a casa de la comar Forte pròpe a l’ura che vie dit.

Franco) E gh’è nat töt bë?

Strinaròss) Töt mal, messer Rivoletto.

Franco) Come mal? Gala cambiàt idea a l’ültim minüt?

Strinaròss) No, messer Rivoletto. L’è che, chel becamort del so òm, gelus compagn de en cà, l’è fiondàt come na bala de s-ciòp prope quan che nóter du siegn dre a... brasas, bazas, strinzis. En pratica gh’era quasi finit töcc i preliminari e... ma nó che lü el ria come na schègia, ensèma ad alter sò compar e töcc i se mèt a sercà, come se pöl dì, l’amante de sò fómna.

Franco) Come? E vó siev lè? Siv semper stat lè?

Strinaròss) Sie lé, so sémper stat lé.

Franco) E nüsü gh'è stat bu de catav?

Strinaròss) Lasim parlà, l'è mia finida ché. Per furtuna gh'è riàt comar Margì ad avisàgn che gh'era dré a rià chel cornuto de Franco Forte. Al moment, le sa mia che fa, pö le se enventele de scundim en de la sista de la bögada e de fam portà föra de casa co' la roba spurca.

Franco) Ne la sista de la bögada?

Strinaròss) Sé, le m'ha enfrognàt denter en mès ai mantì e le toaje ónte, a le calsitine e a le mödande che spösàa. E nö ve dize la spösa. Na spösa che faa vègner de gómit. Ròbe de mörer sfisiàcc.

Franco) E quant temp siv stat scundìt en chèla sista?

Strinaròss) Ah, l'è gnamó finida. Ciamàcc da la padruna, ria du servidur, i g'ha ciapàt la sista per portam zó al lach come che se fa co la bögada spùrca. Ma noria chèl cavrù del sò òm?! Sübit el domanda cosa gh'è en de la sista. M'è parít de mörer tre olte. Prim: de la pora che 'l me catàes me s'è muit el stomèch, m'ha ciapt el mal de pansa e m'è vignit en curi-curi de l'alter mond. Second: en mès a töta chèla spösa, schisàt come che sie, pudie mörer de asfisia. E ters: pudie mörer negat. Za mès embambolàt dela spösa, querciat come sie, sie apò töt südat e lur i m'ha batit zó en de l'acqua zelada del lach. L'è stat en miracol se no só mòrt negàt.

Franco) Só prope dispaizit de töt chèl che v'è capitat. Adès parle föra dei dèncc: chèsto völ di alura che per me gh'è pö speransa? Völ di che la lasì pèrder e ghe farì pö la corte?

Strinaròss) Vó me cunusì mia bé, gna se i me cópa lase pèrder. Ve dizaró de pö, stamatimna el sò òm el gh'è mia e lé la m'ha mandàt a di che tra le ôt e le nöf la me spèta. Siv content?

Franco) Adès j-è le ôt pasade.

Strinaròss) G'ho de pesegàm. Turnì quan che nì òja messer Rivoletto, e ve cöntaró come che l'è nada. Sti tranquilo. I córegn al siòr Franco Forte i ghe j-a caa pö nüsü.

Franco) Èco chèl che capita a tö moer. Ma staolta el me scapa mia, varde en töcc i büss e büzilì. Me mètei i córegn come chèi de en toro? E me, compagn de en toro j-encornaró töcc du.

## ATTO IV

### Scena II - la casa di Forte

(Entrano Strinaròss e Alice Forte.)

Strinaròss) Cara siùra Alice, el vòs dulur el g'ha cancelat töcc i me dispiazéer. Capise da le vòse parole che me vuliv bé e isé ve dize che saró vòs servidur per semper. El me cör l'è vòs. Siv sicüra che el vòs òm l'è mia de chèle bande ché? Sicüra che gh'è mia pericol che el turne?

Alice) L'è 'ndat a cacia, sti tranquilo cavalier.

Margì) (*Di dentro*) Ehi oh, comare Ford ehi!

Alice) Ser Gioàn, pasì en de l'altra stansa, per piazér. (*Strinaròss esce. Entra Margì Pagìna.*)

Margì) Dizim en pó, comar, gh'è vergü alter ché, en casa vòsa?

Alice) Nò, nüsü, apena i servidur.

Margì) Ah de bu?

Alice) De bù, perché? (*A bassa voce*) Alsì la us che el ve sènte bé.

Margì) Bene bene, so pròpe contenta che no ghe sape nüsü alter en casa.

Alice) Perché?

Margì) Perché el vòs om, cara mia, l'è ché de föra che 'l vuza come en mat. L'ho mai vist isé gelus e isé encasàt. So prope contenta che chèl tal gras cavalier no el se cate ché con de vo.

Alice) El cavalier? Siv sicüra che el parla pròpe del cavalier?

Margì) Aterf fat che sicüra. El sbraita che el völ copal. El dis che l'ultima olta el gh'è scapat per en pelo en de la sista de la bögada e che staolta l'è sicür de becàl. Menomal che ché el ghe mia, forse el vòs òm el la mocherà de èser gelus.

Alice) Endó el adès el me òm, comar Margì ?

Margì) L'è zó en fond a la via, el sarà ché a minücc.

Alice) Sö ruinada. Per me gh'è pö gnènt de fa. El cavalier el se cata prope ché!

Margì) Alura siv pròpe ruinada. Ruinada per ruinada l'è mei che 'l fóme scapà. Mandil via sübit. Mei ruinada vo che mòrt lü. L'è mei la vergogna ca l'assassinio.

Alice) Da che banda pòdel scapà? Che pòde fa? Endó el sisteme? N'altra olta en de la sista?

Strinaròss) (*Entra.*) No, en de la sita no! Foi a ura a scapà prim che 'l rie?

Margì) Ahimè, tre fradèi de Franco Forte i s'è mes sö i trè öss con tre bastù gròs isé, pròpe per mia fa scapà nüsü.

Strinaròss) Che foi? Me sconde en del cami?

Alice) El camì l'è el prim post endó ché se va a vèder de solit. En qualche vestare?

Strinaròss) Endó el en vestare?

Alice) El vardarà apò lé, el varderà empertöt. L'è emposibil scundiv en chesta casa.

Strinaròss) Alura me sconde de föra.

Margì) Se nì fora e i ve riconòs, siv zabela 'n òm mort. Ameno ché no nìghe föra travistit.

Alice) E come se pöl travestil?

Margì ) Fim pensà. L'è talmente gròs che le nòse sotane le ghe va mia bé, sedenò, en capel, o en fasöl söl có, o na sciarpa, el sarées pudìt pasà per na fómna e rià a scapà.

Strinaròss) Care le me fómne envintì vergót a la svelta, vöi mia mörer.

Alice) La zia de la me sartura personal! Chèla ciciuna che sta a Peschiera, l'utima olta che l'è vignida a catà sò niuda, la g'ha desmentegat ché en sò vistit.

Margi) La me par na buna idea. L'è grasa e gròsa sö per zó compagn del nos cavalier. De sicür la garà lasàt ché apò el capèl. Curi de sura a cambiav cavalier.

Alice) Nì, nì, sti mia a pèrder temp. Entant me e la comar Pagìna ve sercaròm en vergót per mascherà la facia.

Margi) Sö, curì, noaltra riom sübit per aidav a vistiv. Entant mitìv la sotana.

(*Esce Strinaròss.*)

Alice) Set mia che bèl se el me òm el ghés de catàsel deanti isé mascheràt! Lü el pöl mia vèder chèla ciciuna de Peschiera. El g'ha proibìt de mèter pè en casa nòsa. El g'ha dit che la prossima olta che la se faa véder el l'ares ciapada a bastunade.

Margi) Che el Signur el varde en zó e che el diaol el ghe mète la cua.

Alice) Ma, el me òm el drè a rià de bu?

Margi) Sicür. El parla apò de la sista. Chisà come che el g'ha fat a sail?

Alice) Siv che fom? Ghe dizóm ai servidur de portà amó föra la sista de la bögada, come che i g'ha fat l'altra olta e stom a véder.

Margi) Entant, nòm a vèster de strìa chel bombolòt semo che gh'è de sura.

Alice) Prima dó ùrden per la sista de la bögada. Ni che me rie sübit.

(*Margi esce. Entrano Tone e Batista.*)

Alice) Ve racomande, ciapì la sista e se el me òm el ve dis de fermav e de vödala scutil e fi chel che el ve urdina. Sö, sti mia a pèrder tèmp. (*Esce.*)

Tone) Coragio, tirom sö la sista. Sperom che no ghe sape denter la cavalleria come la olta pasada.

Tone) Pötos de la cavaleria preferirés che la simes de fèr o de piòmb.

(*Entrano Franco Forte, Pagìna, Penansima, Caius ed don Ugo.*)

Franco) Ridì, ridì! E se 'l fós töt vera maestro Pagìna? Zó chèla sista furfanc. Vergü i naghe a ciamà me moer. Che rasa de rüfià! Adès lè finida de tramam dré a le spale. Alura, endó èla mè moer che ghe fó vèder che bèla bögada grasa e spurca la manda a laà.

Tomaso) Siv dré a pasà töcc i limiti, caro el me siòr Franco Forte. Vo siv mat de ligà.

Don Ugo) Mat matènt. Se carés de mitil en manicomio e pàter via la ciaf.

Penansima) A dì la verità, siòr Franco Forte, si dré a fa na ròba mia tant bèla.

Franco) El só apó me che l'è na ròba mia tant bèle. (*Entra Alice Forte.*) Vigni en sa madama Alice Forte. Fómna onesta, modesta, töta casa e virtù, che la g'ha de soportà un òm gelus poarèta. Sbaglie sö töt, el mia vera?

Alice) Sbagliv prope töt. Sospetà de me? Isé? Me no vó mai dat motivo de sospetà. Pudi dil forte che só semper stada onesta.

Franco) Onesta diziv? Bel müs de tóla a parlà isé. Ve föra infame (*strappa i panni dalla cesta*).

Tomaso) En laur compàgn el sta gna en ciel e gna 'n tèra! Lasì pèrder!

Alice) Ma ghiv mia vergògna a fa isé? Lasì sta la me bögada.

Franco) Lase sta gnènt. L'è lé dènter e adès el ve föra, co le bune o co le catie.

Don Ugo) Che n'è amó de véder! Siv dat föra de mat! Mèter el nas en de la pöcada de vòsa fómna!

Franco) Ve urdine de tirà föra töt da la sista.

Alice) Perché caro el me òm, perché?

Franco) Maestro Pagìna só sicür che gh'è un òm en casa mia. Ger, sota el me nas, l'è nat föra de casa mia en chèsta sista e la gh'è nada bé. El podarés proà a scapà apó adès scundìt lé dènter. Vüdi la sista, föra töta la ròba.

Alice) Se catariv en òm lé dènter che me rèste ché sèca fùlminada!

Tomaso) No gh'è denter nüsü!

Penansima) Parola d'unur siòr Franco Forte chèl che ghìv fat l'è gna en pó bèl.

Don Ugo) Siòr Franco Forte lasiv mia ciapà la mà, sti mia a èser celus en chèl sistema. L'è mei che cöntiche fin a dés prim de fa sèrte ròpe.

Franco) L'è mia ché. Alura el cataró scundìt de n'altra banda.

Tomaso) El catarì de nösöna banda, lüle l'è scuntìt apena en del vòs servèl.

Franco) Fim en piazer, aidim a sercàl amó na olta. Se 'l cataróm mia alura podarì töm en gir e dì che só mat, che só stat esageràt, pudì dì chel che ni òja. Però adès aidim a sercal. Cuntintim (*Escono Tone e Batista con la cesta.*)

Alice) Comar Margì vignì zó co la vècia che el me òm el völ vègner en de la camera endó siv vo.

Franco) La vècia? Quale vècia?

Alice) Ma sé, la zia de la me sartura personal, sò zia l'è ignida a catala. Chèla cicùna de Peschiera.

Franco) Chèla vècia stria rugnusa! Come s'èla permesa de mèter pè en casa mia. Ghe lie proibìt. La va en gir a lèzer le mà, a fa le carte, a fa le fatüre e chisà quanti alter embròi. Ve zó de lé strià che te sisteme me per le feste.

Alice) Stì mia fa isé, l'è vècia. Me par mia el caso de menàla. Aidim apó vóter a tignil calmo.

(Entrano Strinaròss vestito da donna e Margì Pagìna.)

Margì) Sö, só comar Spìfera, abelase, dim la ma.

Franco) (*Lo bastona*). Föra de la me casa bröta embrujuna, stria, vècia rugnusa. Apó se te lèter le ma te ghé mia preìst de ciapà en fraco de bòte encö. Vöt che te la lèze me la ma? Föra föra

(Esce Strinaròss.)

Margì) Vergugnìv! Liv mèza copada poera fómna.

Alice) Oh, l'è bela bù de fal. Bèla fórsa, bèl coragio, ciapasela con de na vècia.

Franco) Che la s'empiche, bröta galina!

Don Ugo) A di la verità el c'ha mia töcc i torcc, apó me c'ho dei döpe che la sape depù na stria.  
Apó se 'l müs l'era scundit sota 'l capèl e la sciarpa, me par de vica entraìst na **parpa**(barba).

Franco) Bröta carogna! Fa nient, adès l'è nada. Siòri vulì vignim dré che metom la parola fine apò a chel'altra storia. Vedom se g'ho rezù o nò a èser gelus?

Tomaso) Ma sé, nom e finomela föra apó co' sta mania de j-òm scundìcc. Nom töcc a sercàl.

(Escono Franco Forte, Pagìna, Penansima, Caius e don Ugo.)

Margì) Ostìs, quante che el ghe n'ha dàt. El ghe n'ha dat en fraco e na sporta.

Alice) Bastunade a l'orba, endó che 'l tiràa el tiràa. El g'ha fat bé.

Margì) Gh'en volarés ogne tant de bastunade isé a serta zènt.

Alice) L'aral capida de lasàgn sta, de stagn a la larga?

Margì) Dopo töt chel che gh'è capitàt, spere pròpe che ghe sape pasat la òja de fa porcherie.

Alice) E ai nòs òm? Ghe la cöntóm come che l'òm sistemàt?

Margì) Ma sé, per fòrsa, nó fos alter che per tirà vià töcc i bisulì che g'ha en del có el tò òm. E se lur dopo i volarà vendicàs amó na ólta, noaltra som pronte per aidai.

Alice) Magari i volarà mortificàl ne piasa deanti a töcc.

Margì) Forsa, nom a stüdià amó en qualch schers, tanto l'è carneal. Batom el fèr entant che l'è cald.

#### Scena IV - la casa di Forte

(Escono. Entrano Pagìna, Franco Forte, Margì Pagìna, Alice Forte e don Ugo.)

Don Ugo) Vò chiv de le perle de móer.

Tomaso) Fim capì, el v'ha mandat dò letere istèse ne l'istèst momènt?

Margì) J-è riade a en quart d'ura de distansa giöna de l'latra.

Franco) Cara la me fómna sirchì de perdunàm. La gelosia la m'ha enorbàt j-öcc e pó el servèl. Ve promète che 'l capitara pö. Scüzim , scüzim se pudi.

Tomaso) Semper esageràt en töte le ròbe, prima a tormentala e adès a scüzas. Lasì perder ormai l'è nada isé. Empegnómes pötost a stüdià en bel schers per svergognà chel tripù presuntuus del cavalier. E se le nòse fómne le ghes de daga 'n alter apuntament?

Franco) L'è mèi chèl che le g'ha enventat lüre.

Tomaso) Cioè? Envidàl l'öltima sera de carneàl al veliù de vila Brunati, endó saróm töcc mascheràcc? L'è mia isé stüpid, per me el vé mia.

Don Ugo) El ve, el ve. La stüpidità umana la c'ha mai fine. L'è infinita.

Tomaso) Apó me la pense isé.

Alice) Vo pinsì a come tratàl che per fal vègner ghe pensom notre.

Margi) En vèrs mezanòt el portom föra en del giardì de la vila. Scundicc drè a la sésa, saltì föra mascheràcc de fantasmi e de diaòi. Ghe dizì che vuli robaga l'anima. Ghe fom ciapà en spènt tal che ghe pasarà la òja fin che el scampa de fa el galèt co le fómne maridade.

Tomaso) Grant e gròs come che l'è ghiv idea che el gàbes pora dei fantasmi o dei diaói?

Alice) Póra dei fantasmi! Vedari! Nòtre, per ricunusìl ghe dizaróm de vistis de conquistadùr. Só mia, come Attila, gli unni o i visigoti, chèi con l'elmo a du córegn lónch. Vardaróm isé nat.

Tomaso) Ben, metom el caso che el vègne, che pensì de fa de precis?

Margi) Faróm isé. J-òm i sarà visticc de diaoi e de fantasmi e le fómne de Teodolinda, de Rosamunda, de principèse e regine. Quan che se sarom encontrade con Strinaròss, el portaróm föra, e vóter töcc adòs. Notre farom finta de scapà spaentade. I fantasmi e i diaoi i ghe girarà enturen, i la sinsigherà, i ghe domandarà cosa che el fa vistit da conquistadùr.

Alice) Lü primao dopo, a forsa de èser gojàt el dizarà la verità.

Margi) El ciaparà en spaent che se el se la fa mia sóta ghe mancherà poch. E saróm mia contèncc fin che töcc nó i garà vist che fifù e che sbrufù che l'è.

Don Ugo) Vöi veder a mé come la va. Me veste 'pó a me de fantasma.

Franco) Alura sóm a posto, me vó a tö le cadene.

Margi) La me Annetta la sarà na regina vistida de vérd. Ghe metaró sö el có na bèla curuna.

Tomaso) Me vó a tö le candele (*A parte.*) E prope stasera mastro Zìgol el spuzerà la me Annetta G'ho za parlat col prêt. I se spuzera en de la césa de San Biase. Che bél schers per me fómna! (*A tutti*) Chi va a envidà Strinaròss?

Franco) E se me ghes de turna de lù sóta el nòm de Rivoletto, e sènter chel che 'l cönta de fa?

Margi) El ve dizarà che el vé de sicür. Sö, nom a comprà i linsöi, le candele, i solfanèi e töt chel che ocòr per spaentàl.

Don Ugo) **Pèl pèl.** Dómes de fa. A carneal ogne scherso el val.

(*Escono Pagìna, Franco Forte e don Ugo.*)

Margi) Comar Alice, mandì vergü dal cavalier Strinaròss per sai se el vé o no. (*Esce Alice Forte.*)  
Col prèt g'ho za parlàt, adès vó a parlà col dutur. Sta nòt sisteme la me Annetta e se sisteme per le feste el me òm. La fo spuzà al dutur. A carneal ogne scher el val. (*Esce.*)

## ATTO V

### Scena II - Il parco di Villa Brunati

(*Entrano Pagìna, Penansima e Zìgol.*)

Tomaso) Stom cüciacc chè de dré de la sésa fin che nó vedaróm rià le nòse Teodolinde mascherade.  
Sti mia desmentegàv de me fiöla mastro Zìgol.

Zìgol) Se sóm za parlàcc ensema. Lé, la sarà vistida de bianch e per ricunusign me ghe dize:  
Scödela e le la me rispond ciapèla. Isé sóm sicür de mia sbagliàs en töta chèla scufuziù.

Penansina) Bastaa mia el vistìt bianch per cunusila, urcuria prope scödela-ciapèla? Stt. L'è quasi ura.

Tomaso) La not l'è de carbù. El bianch dei fantasmi el sarà amó pö bianch en chèsto scür.

### Scena III - altra parte del parco

(*Entrano Margì Pagìna, Alice Forte e il Dottor Caius.*)

Margi) Siòr dutùr, vardì che me fiöla la sarà vistida de vérd. Quan che sarà el momènt ciapì la so mà e purtila a la cesa de San Biaze. Entan endì en del parco che me g'ho de nà co la comar Margì. Ghiv capìt bé?

Caius) G'ho capìt töt chèl che g'ho de fa. *Adieu (esce.)*

Margi) El mè om el sarà contènt de faga i schers a Strinaròss, ma chisà come che el sarà malcontènt del mé de schèrs ! G'ho fat spuzà l'Annetta al dutur contra la volontà del me òm.

Alice) Endó èla l'Anneta? E 'l rèst dei fantasmi? E i diaoi? E don Ugo endó el finìt?

Margi) J-è cüciacc töcc dedré de la sésa. Quan che riáróm con Strinaròss, j-empiserà le torce e i salterà föra töcc isé uzàt.

Alice) Chisà che spaènt. Nóm, nóm.

Margi) El se la farà sóta, t'el dize mé. E la sarà gnamó finida.

Alice) Chèsto se che l'è en bel schers. L'è quasi ura, turnóm nel salù. (*Escono.*)

## Scena V

Strinaròss) (*Entra ha sul capo un elmo con due belle corna.*) El campanil di Riultèla el g'ha sunàt mezanòt. L'è ura. Che bèla idea chèla de mascheràm de conquistadur. Só en conquistadur e adès riárà la me dama.

(Entrano Alice Forte e Margì Pagìna.)

Alice) Cosa vède: en conquistadur! Siv vó cavalier chèsto gran conquistadùr ?

Strinaròss) Me só en conquistadùr e vó siv la me America.

Alice) Dò americhe, la comar Pagìna l'è vignida con de me.

Strinaròss) Enfati le Americhe j-è do: chèla ensima e chèla sóta. E me só ché, pront a spartìm en dü per contentàv. (*Rumore di dentro*)

Margì) Cos'èl töt sto cazì?

Alice) Misericordia per i nòs pecàcc!

Strinaròss) Perché? Che sücket?

Alice e Margì) Scapóm, scapóm I fantasmi, i fantasmi! El diaól. (*Fuggono.*)

Strinaròss) Posibil che el diaol el ghe mète sèmper la cua!

(*Dalla siepe saltano fuori i fantasmi e i diavoli e gli si fanno d'attorno a punzecchiarlo. Entrano anche gli altri. Sono tutti in maschera.*)

- Som i diaoi e sóm vignicc a töt. Som vignicc a portà via l'anima - Te la fom pasà noter la ója de parlà semper mal dej-alter. - Adès te fóm pasà la ója de fa el galèt - Sbzóm la sò tripa vedóm se ghe ve föra la cativeria.- Som i fantasmi che s'è stofat de vedit a fa el en balù sgionfat – a bée e tracanà – a girà per le osterie - Vec, bacöch a na a sinsigà le brae spuze.- Vergugniv

Strinaròss) Lasim stà, g'ho fat gnènt. (*Si stende in terra a faccia sotto.*)

– cagasotto - - Verme, vile, endiaòlât, smargiàs, vilàn, sbrufù e mort de fàm -

Strinaròss) Chesto fantasma l'è pes de töcc. Ahi, ahi, muchila!

(*Lo tormentano in tutti i modi poi sempre pùnzelciandolo gli girano attorno. Nel frattanto il dottor Caius entra da un lato e si porta via una dama in verde; Zigol arriva dall'altro e rapisce una in bianco; Malafina spunta e si cucca l'Annetta. Dopo il gran frastuno tutti se ne vanno. Nel silenzio Strinaròss si toglie l'elmo e si solleva. Poi entrano Pagìna, Forte, Margì e Alice.*)

Tomaso) T'óm becàt staolta. L'è mia asé vistis de conquistadùr per èser en conquistadùr. Ve la siv fada en bràgue de la póra, cavalier?

Margì) Basta schersà. Alura cavalier che gne diziv? Ve piazzele amò le comar de Riultèla? (*Indica le corna dell'elmo*) Chèsti córegn i starés mèi scundìcc en de en bòsch che ché en paés.

Franco) Cavalier, chi èl el cornuto adès? El sior Franco Forte o Strinaròss en conquistadur? Che gal conquistat? Ve 'l dize mé: na sista de la bögada, el bagn en del làch e 'n fraco de bastunade.

Alice) Cavalier, som stacc sfürtünacc, som mai riacc a encontrais de sui.

Strinaròss) Me par de capì che voalter mi scambiàt per 'n àzen fat e finít.

Franco) Sé, per 'n àzen e per en cavrù. G'ho le pröe de chel che dize.

Strinaròss) Chesti alura j-è mia né fantasmi e né diaoi? M'era vignit en qualch sospèt...

Don Ugo) Cion Strinaròss, muchila lé a la vòsa età de fa el pajaso, de curiga dré a le fómne.

Franco) Ben detto, fantasma Ugo.

Don Ugo) E apó vo ghi de mocale lé de èser celùs come en cà de vòsa fómna.

Franco) Basta, promès. Faró come i francés. Saró pö gelùs.

Margì) Cavalier, cridiev de bü che se nòtre garesem decidìt de cambià óm, garesemn catàt föra vò?

Franco ) En salamòt isé, en sach de patate compagn? Ma via!

Margì) En balù sgionfat!

Tomaso) En mort de fàm cómpagn? Vec, bacöch e co' la pansa compagn de na gròsa angüria? De dò angürie?

Franco) Endiaòlât, smargiàs, vilàn e sbrufù!E che parla sèmper mal dej-alter?

Don Ugo) Che va sö e zó per le osterie, che pév, che zöga a sólcc, che pestemia e che l'è sèmper pront a tacà péga?

Strinaròs) E va bé, sì vòter che g'ha el cortèl per el mànech. Fì chèl che vulì de me.

Franco) Corpo del diaol. Ve mandaróm a Riultèla da en certo messer Rivoletto, vuliev faga de röfià, vel ricurdiv? E garì de daga en drè töte le palanche.

Tomaso) Basta, basta. Sta nòt l'è l'ültim de carneàl, se g'ha de sta alegher. Nóm töcc a fa festa. E pö vò Strinaròss ridì de mè fómna, mia per el schers che la v'ha fat lé, ma per chèl che me g'ho fat a lé. Diziga che mastro Zigol el s'è maridat con sò figlia.

Margì) (*A parte*) Sé, me fiöla. Me fiöla a chel'ura chè la g'ha za spuzat el dutur caius.

Zigol) (*Entra.*)Ah, uh, uh, maestro Pagìna!

Tomaso) Caro el me tus: töt a posto? Gh'è nat töt bé?

Zigol) Àter che bé! Pö stòrt de isé la pudia mia nà.

Tomaso) Stòrt? Cos'el che gh'è nat stòrt?

Zigol) G'ho fat e so nat pròpe come che s'era cumbinàt. Mascherada come che l'era cridie pròpe che l'eres so fiöla. Envece nò, l'era el scarpulì che sta en piasa.

Tomaso) Caspita, che fregadüra!

Zigol) Àter fat che fregadüra. Pròpe en schers de carneàl. Che me en fói me de en scarpulì !

Tomaso) Ta fae mia isé stüpid. T'ere dit che te gareset ricunusìt me fiöla dal vistit.

Zigol) Me só nat de chèla vistida de bianch e g'ho dit "scödela!" e le la m'ha rispundit "ciapèla" pròpe come s'era combinat, però l'era mia l'Annetta, nò: l'era el garzù del fornèr.

Margì) Caro el me Tomaso, sta mia encasàt. G'ho scoperto i tò machinamèncc e g'ho fat en modo de vistila de verd. Adès l'è za spuzada col dutùr.

Caius) (*Entra*) Endó èla la comar Margì, i m'ha fat fèso. I m'ha rifilat en tus, un *garçon*, en garzù, un *paysan*, en *mas-cc*, e de sicür l'è mia la bèla Anna Pagìna. So stat embrojàt.

Margì) Ma come sarés a dì. Si mia nàt a tò sö chèla vistida de vérd?

Caius) Giösta, vistida de vérd, e l'era en tùs! Serti schèrs a me, dutur frances se i fa mia ! Fó saltà en aria töta Riultèla.

Franco) Strano. Alura chi el che s'è cucàt la vera Annetta?

Tomaso) G'ho en bröt presentimènt. Èco che ria compàr Maltafina.

(*Entrano Maltafina e Anna Pagìna*)

Tomaso) Alura compàr Maltafina?

Anna) Mama, bubà, perdunìm! Bubà perdùnem, mama perdùnem.

Tomaso) E alura madamina, come mai si mia endàda con de mastro Zìgol?

Margì) Come mai te set mia nada gna col dutur frances?

Maltafina) Sti mia spaentàla! Ve la cönte me la verità: Voalter vardaèv apena a l'interès, miraèv a maridala sensa amùr. Noalter dù l'è de en pès che se volom bè. E adès le l'ho spuzada. Sti mia a uzaga dré. La v'ha mia scultàt apena perché "al cör non si comanda".

Franco) Via töte le face de funeràl. Ormai se pöl pö faga gnènt. L'era scrit en del ciel che la ghéres de finì isé. Coi sólcc se pöl compra tère e case ma l'amur nüsü i la vènd.

Strinaròss) G'ho pròpe göst. I vulia fam en schèrs a mé e j-è restàcc lur schersacc.

Tomaso) Sta olta l'è nada isé. Se pöl pö faga gnènt. Maltafina, ve augure tanta felicità.

Strinaròss) Quan che se va a palpù de nòt, chèl che se brinca se brinca.

Margì) Basta bruntulà. Compàr Maltafina che el Signur el ve mande bune giornade alegre. Nóm caro el me òm, turnom töcc a fa festa. Töcc a pó el nòs cavalier Gioàn el vègne ensema a nóter, a rìder con de nóter dei schers de carneal che gh'è stat fat sta nòt.

Franco) Così sia e amèn. Cavalier Gioàn a la fi de la sunada chel che mì empròmès el mantignì: perché Mastro Fontana sta nòt el la pasará ensema a la comar Forte.

Tutti ) Evviva!

Strinaròss) Som stacc töcc fregàcc!

(*Escono.*)

*Fine*